

明

通

鑑

明通鑑卷八十八

江西永甯知縣當塗夏燮編輯

紀八十八

元武敦牂
盡一年

莊烈皇帝

崇禎十五年春正月癸未起孫傳庭復爲兵部侍郎令督京軍援開封上御文華殿召對問勦賊安民之策傳庭侃侃言上嗟嘆久之比至開封圍已解乙酉保督楊文岳援開封賊已去南陷襄城殺知縣曹思正訓導張信典史趙鳳豸寄輜重焉復攻西華知縣劉伯驂登陴死守賊驅其下爲十覆迭攻之城陷伯驂懷印投井

死時陝督汪喬年率總兵賀人龍鄭嘉棟牛成虎出潼關會賊遣其黨據臨潁總兵左良玉破而屠之自成怒轉攻良玉良玉退保鄆城賊圍之文岳會督師丁啟睿及總兵虎大威之師往救相持十晝夜未決喬年方出關與諸將議所向曰鄆城危在旦夕吾趨鄆城賊方銳難與爭鋒襄城距鄆僅四舍賊老砦咸在吾舍鄆而以精銳攻其必救賊必還兵則鄆城解矣鄆城解我擊其前良玉乘其背賊可大破也諸將皆曰善乃留步兵火器于洛陽簡精銳萬人兼程進次郊縣襄城諸生張永祺等導喬年入城 戊子免天下十二年以前逋賦

是月山東盜平初上以山東之亂改總河張國維爲兵部侍郎兼督淮徐臨通四鎮兵護漕運賊首李青山擁衆數萬據梁山灤遣其黨分扼韓庄等八牐尋舊輔周延儒赴召青山謁之言率衆護漕非亂也延儒許言于朝授以職而青山竟截漕舟大焚掠逼臨清國維統所部兵擊之會京營總兵黃得功副將周遇吉破賊鳳陽旋師過山東至是合擊之于壽張追至東平殲其衆殆盡青山降獻俘于朝磔諸市 召前刑部尙書鄭三俊復其官劉澤深以去年十二月卒起三俊代之 二月戊申振山東就撫亂民 癸丑陝西總督汪喬年次師

襄城賊果解郟城圍以數十萬衆來攻喬年亟勒兵駐城外分遣賀人龍鄭嘉棟牛成虎分三路駐城東四十

里比賊至三帥未陣而奔副將馬名廉戰沒

版選據明史喬年傳

記死事諸臣云有馬帥某者失其名三編所載名廉者卽其人也今據增

軍大潰喬年嘆曰

此吾死所也率步卒千餘人城守賊穴城實火藥轟城城遂裂喬年穿阱隨賊所鑿以長矛刺之賊死甚衆閱五晝夜守具皆盡望良玉來援竟不至丁巳賊攻之急礮擊喬年坐轟雉堞盡碎左右環泣請避之喬年怒以足蹴其首曰汝畏死我不畏死也守益固及城陷巷戰手刃三賊自刎不殊爲賊所執大罵賊割其舌磔殺之

襄城人建祠祀焉副將張國欽張一貫黨威李萬慶及
監紀西安同知孫兆祿同死之兆祿材官李可從衛兆
祿不克亦死之萬慶卽十三家降渠射場天也自成怒
張永祺開城迎喬年索之不得屠其族剝別諸生劉漢
臣等百九十人及異喬年死事据明史本紀在是年二
月又本傳及左良玉李萬慶等傳皆以
正月至襄城二月被圍城陷死故三編亦据之若紀事
本末及綏寇紀畧則皆書于十四年之冬而紀畧並言
自成既陷襄城遂乘勝攻南陽然南陽之役在去年十
一月若据所記則先陷襄城後陷南陽又在十一月以
前矣史稿記襄城之陷于十四年十一月癸酉盖据紀
事本末也攷傳宗龍以去年九月月中旬戰沒事聞方命
喬年出關討賊則喬年之奉詔已在十月冬月間而自
成方圍南陽喬年並無赴援之事是喬年出關必歲暮
正月初時明矣且明史本傳所記喬年入襄城在二月二
日城陷在二十七日核與本紀所記丁巳僅相差十日

然其事同。在是年之二月，固不誤也。今月日仍據明史本紀書之，而增辨于此。又按李可從，衛兆祿，不克死之，並見全氏二曲先生墓文。可從，卽二曲父也。初，喬年撫陝，屬米脂知縣邊大受，受三編發自成先冢，大受謂得其族人爲縣吏者，撈

受作綬

治之言去縣二百里，爲李氏村，在亂山中，凡十六冢，環

而葬，中其始祖也。相傳壙中有鐵燈檠，鐵燈不滅，李氏興如其言，發之，螻螳數石，火光熒熒然，斲棺骨青黑，黃毛被體，腦後一穴大如錢，中盤赤蛇，長三四寸，有角，見日而飛，高丈許，咋咋吞日光者六七反，而伏。喬年函顛骨，腊蛇以聞，焚其餘，雜以穢弃之。自成聞之，齟齬大恨，曰：吾必致死于喬年。至是，喬年之遇害，獨酷云。戊午

大清兵克松山先是松山圍久上命順天巡撫楊繩武督師救洪承疇又代以兵部侍郎范志完皆歛兵不敢出副將焦埏赴援甫出山海關卽敗沒轉餉路俱絕闔城食盡副將夏成德遣子爲質約期爲內應

大清兵至期攻之城遂下巡撫邱民仰及總兵官曹變蛟王廷臣兵備道張斗姚恭王之禎副將江翥饒勳朱文德等皆死之承疇及祖大樂被執卽中張若麒逃從海上蕩漁舟奔還承疇遂降于

大清事聞或傳承疇已死上震悼甚命設壇都城賜承疇祭十六民仰六尋敕建祠都城將親臨賜祭聞承疇

降乃止 是月以孫傳庭總督三邊軍務代汪喬年也
李自成自襄城去復由西華攻陳州僉事關永傑與
知州侯君擢鄉官前戶部主事崔泌之舉人王受爵等
率士民分堞守賊遣使說降斬其頭懸之城上賊怒攻
破之永傑格鬥不支中亂刃死君擢身先士卒運木石
擊賊多死者城破被執罵不絕口死泌之用鐵杖斃賊
數人自刎死受爵擊殺數賊被執大罵死守備張鷹揚
力戰亦被禽不屈死有龔作梅者年十七父母俱亾殯
于舍賊火民居作梅跪柩前焚死賊遂自陳州分部犯
睢州州缺正官通政使李夢辰方家居卽乘城禦賊無

何賊從他門入擁夢辰見羅汝才汝才問所欲曰我大臣但欲死耳汝才遣其客說降且進之酒夢辰覆杯于地太息起扼吭而卒其妻王氏方病聞之不食死里居太平知府杜時髦亦死尋陷太康甯陵考城太康知縣魏令望里居僉都御史張維世富平知縣馮正吉皆死之維世妻李氏子正誼孫昱正吉妻任氏子昌辰俱殉焉賊乃悉衆攻歸德推官王世琇遷工部主事將行僚屬邀共守慨然曰久官于此臨難而去之非義也遂與副使蔡鳳僉事吳汝琦同知顏則孔經歷徐一源商邱知縣梁以樟教諭夏世英里居尙書周士樸等誓衆堅

守賊攻圍七日總督侯恂家商邱其子方夏率家衆斬關出傷守者衆遂亂賊乘之入鳳汝琦世琇則孔及指揮賈之瑄竝遇害則孔之妻女殉之之瑄妻許氏抱二女投井死一源分守北門殺賊多城陷巷戰死之以樟中賊刃久而復甦妻張氏及子女僕從皆死以樟竟獲免世英持刀罵賊死于明倫堂妻石氏亦自刎士樸及工部郎中沈試大學士鯉孫也主事朱國慶中書侯忻光祿署丞侯執中廣西知府沈仔威縣知縣張儒及舉人徐作霖吳伯允周士美官生沈泌侯駿貢生侯恒沈誠周士貴國學生侯棕沈倜諸生吳伯裔張渭劉伯愚

等皆死而作霖伯允伯裔渭伯愚五人皆郡中名士也

攷異明史本紀書三月陷陳州辛卯陷睢州丙申陷歸

德而据列傳及三編目中俱系之二月緩寇紀畧則云

歸德以二月二十七日陷以攻陷之次第攷之則先陷

陳睢再陷歸德本紀盖据奏報月日耳今据三編書子

是月陷 戶部尙書李待問罷以待郎傅淑訓代之

三月丁丑魏照乘罷照乘在閣四年庸碌無所見御史

徐殿臣劾其暱妾弃妻縱婿爲奸諸醜迹照乘力辨之

御史劉之勃謂大臣不當爭辨上責其妄議而照乘內

不自安遂引疾去 己卯祖大壽以錦州降于

大清松山旣下甯遠關門勁旅潰喪錦州城中糧亦盡

人相食大壽戰守計窮遣人投軍門乞降

大清遂下錦州 壬辰封皇子慈炤爲永王 是春江

北賊陷含山和州先是張獻忠合于革左二賊出入英

霍山中遂陷亳州知州何變以居民逃竄城不能守爲

賊執欲降之不屈斷足剖胷而死縣首市上三日耳鼻

猶動賊遂流擾霍邱知縣左相申巡檢吳某死之至靈

壁知縣唐良銳死之至盱眙主簿胡淵死之

以上皆去年事至

是江北之賊合攻含山和州陷之南京戒嚴 京軍總

兵官孫應元擊賊于羅山孤軍無援遂陳沒應元善戰

在行間功最多與黃得功偕應元旣沒得功勛益顯

夏四月癸亥李自成復圍開封自成再攻開封不克賊

被劄懼而逃者數千人自成乃下令勿攻設長圍爲久
持計詔孫傳庭亟出關赴援 乙丑謝陞罷初

大清屢遣書議和兵部尙書陳新甲以國內困敝亦請
主和以紓患私言于傳宗龍宗龍出都以語陞陞後見
松錦圍久不解述宗龍之言于上上召新甲詰責新甲
叩頭謝罪陞進曰倘肯議和亦可恃上嘿然尋諭新
甲密圖之乃遣職方郎中馬紹愉奉書議和

太宗文皇帝報書許之以書授紹愉遣人護送抵連山
紹愉未至而陞昌言于朝房謂給事中方士亮倪仁禎
等曰議和事諸君不必言上祈籤奉先殿意已決又言

人主以不用聰明爲高上太用聰明致天下事壞士亮等退謂陞誹謗君父洩禁中語仁禎及同官廖國遴等交章論之斥陞大不道無人臣禮士亮復繼言之疏數十上上大怒削陞籍是月獻賊攻廬州先是三月間賊攻舒城舒城令以憂去鄉官故編修胡守恒與游擊孔廷訓督兵民共守廷訓縱所部浮掠舒人逐之廷訓怒而降賊教以衝棚穴城穿數處守恒督守堙者塞之賊射書約降守恒燔諸堞及城破降卒執守恒以獻賊縱守恒腹以矛中數十創而死遂攻六安有川將覃世勛亦通賊城遂陷遣其黨分掠旁邑游騎直抵廬州城

下 五月己巳孫傳庭入關首誅賀人龍人龍兵潰再
逃陣失主帥且其家在米脂與自成同鄉里諸賀多在
賊中時上密授意傳庭誅之傳庭在道佯爲之請曰人
龍臣舊將願貰其罪俾從臣自效上若不得已許之及
至西安人龍從數十騎來謝傳庭乃大集諸將縛人龍
坐之麾下數其罪謂其開封噪歸猛如虎以孤軍失利
而獻曹出柙也又謂其遇敵先潰新蔡襄城連喪二督
也趣卽斬之諸將莫不震懼初傳庭召對謂得精銳五
千人可以平賊旣西行偵汴事者報賊棋置數十營望
塵莫見其際乃圖上方畧請練兵二萬餉百萬上以其

與面奏不符責令練所發兵足餉一月卽卷甲出關毋逗撓取咎傳庭不得已乃議出師 甲戌張獻忠陷廬州先是賊陷舒城改爲得勝州據之遂自六安薄廬州知府鄭履祥通判趙興基經歷鄭元綬合肥知縣潘登貴指揮同知趙之璞里居參政程楷分門守監司蔡如蘅貧戾民不附賊謀滿城中不能知會提學御史徐之垣以試士至獻賊遣其徒僞爲諸生襲儒冠以入夜舉礮城中大擾之垣如蘅履祥登貴並縋城走興基時守水西門聞變挺刃下戍樓與門斬數人被劄死元綬楷守南薰門並殉難之璞守東門巷戰死 丁亥王樸弃

市時論松山矢事以樸先逃下法司會鞫擬罪而吳三桂仍鎮山海加提督銜寘不問御史郝晉言六鎮罪同皆宜死三桂實遼左主將不戰而逃奈何反加提督兵部尙書陳新甲覆議請獨斬樸勒馬科軍令狀再失機卽斬決三桂失地應斬念守甯遠功與李輔明白廣恩唐通貶秩充爲事官時諸將多擁厚貲賂權要故樸以外皆獲宥 六月戊申賀逢聖罷逢聖與周延儒同再召上待之不如延儒及是逢聖予告歸宴餞便殿感泣大哭伏地不能起上亦爲之泫瀾動容 癸丑張四知罷 甲寅詔天下停刑三年 己未以詹事蔣德璟黃

景昉戎政侍郎吳姓俱禮部尚書兼東閣大學士預機務先是命會推閣臣吏部尚書李日宣等以德璟景昉倪元璐劉宗周及姓諸人名上上令再推數人副都御史房可壯工部右侍郎宋致大理寺卿張三謨預焉大僚不獲推者爲流言入內

卽二十四氣之說見后

上深惑之召日

宣及與推諸臣入中左門偕輔臣賜食已出御中極殿召諸臣奏對致陳九邊形勢甚辨上惡其干進叱之乃命德璟景昉姓入閣姓之柄用周延儒與有力焉延儒再相逆案故輔馮銓頗助爲謀延儒許復其冠帶銓果以捐資振饑屬撫按題叙延儒擬優旨下戶部公議大

沸延儒忠之兵部侍郎馮元颺與姓善因說延儒援姓
共爲銓地姓旣入閣延儒語銓事姓唯唯退召戶部主
議者告以逆案不可翻寢其疏不覆延儒始悟爲姓給
于是兩人遂有郤 庚申釋故尙書侯恂于獄令督左
良玉軍援開封先是四月李自成再圍開封良玉以兵
往救戰不利監軍主事余爵被執罵賊死從子敦華同
遇害良玉遂引兵去開封圍久不解廷議以良玉軍無
鬥志而恂故遇良玉有恩乃命恂代楊文岳爲總督合
督師丁啟睿之兵馳援汴急又發帑金十五萬犒良玉
軍以激厲之 壬戌下吏部尙書李日宣等六人于獄

上以會推閣臣不稱旨責日宣等回奏奏上怒不解復御中左門召日宣對狀次召吏科都給事中章正宸河南道御史張煊及房可壯宋致張三謨上詰日宣曰汝嘗言秉公今何事不私正宸奏日宣多游移臣等嘗劾之然推舉事實無所徇日宣復爲致等三人解上愈怒立命錦衣逮日宣等六人竝褫冠帶就執時日宣所推蔣德璟等多採人望中外稱公然周延儒頗有所參預致之得預再推延儒實主之延儒客盛順嘗爲浙江巡撫熊奮渭管內召果推南京戶部侍郎致父繼登官浙江右參政知其事遂深信順順爲致營推舉于延儒甚

力而日宣不知也。上入蜚語惡日宣特甚。詰責聲甚厲。侍臣皆股栗失色。德璟與黃景昉叩頭辭新命。言臣等並在會推中。若諸臣有罪。臣等豈能安延。儒等亦乞上優容之。皆不許。遂下刑部獄。廷臣交章申救。不納。上疑日宣未就獄。責刑部臣。尅期三日定讞。侍郎惠世揚徐石麒擬予輕比。上大怒。革世揚職。鑄石麒二秩。郎中以下罪有差。御史王漢言。枚卜一案。日宣等無私陛下。欲重其罪。刑官莫知所執。不聽。獄上。日宣正宸煊戍邊。可壯攻三謨等。削籍。是月。總兵許定國援開封。率山西軍次沁水。一夕潰去。甯武兵亦潰于懷慶。卒不赴時。楊

文岳未受代仍統所部會丁啟睿于是左良玉及虎大威楊德政方國安四鎮軍同會師于朱仙鎮是夏起馬士英總督廬鳳軍務討張獻忠先是獻賊陷廬州連陷無爲廬江演水師于巢湖孫應元旣沒中官盧九德以總兵黃得功劉良佐之兵擊賊于峽山再戰敗績得功退屯定遠江南大震方周延儒之再召也逆案阮大鍼輦金錢要之維揚求湔濯延儒曰吾此行謬爲東林所推子名在逆案可乎大鍼沈吟久之曰瑤草何如瑤草士英別字也延儒許諾至是鳳督高斗光以失五城逮治禮部侍郎王錫袞薦士英知兵延儒力贊之遂有

是命 秋七月己巳朔官軍潰于朱仙鎮時賊營于西
官軍營于北左良玉見賊勢盛欲拔營遁乘夜縱其軍
突諸營諸營驚潰良玉軍掠諸營馬羸以去于是四鎮
兵悉奔丁啟睿楊文岳走汝甯獨副將姜名武一軍堅
壁不動侵晨自成擁衆大至名武督麾下血戰殺數百
人力竭被執大罵爲賊磔死賊乃往追良玉軍自成戒
其衆毋疾追俟良玉兵過從後擊之官軍幸追者緩疾
馳八十里而賊已繞出其前傍溪谷穿塹深廣各二尋
環百里自成親率衆遮其後良玉扼于塹不得進諸軍
相率下馬欲渡賊追者譟而至良玉兵大亂自相蹂踐

仆谿谷中後人趾乘前人之顛以過棄馬騾萬匹器械無算監軍僉事任棟沒于陣良玉遂走襄陽時侯恂尙未至軍上聞援軍屢潰怒甚褫啟膺文岳職逮治許定國誅楊德政詔恂拒河圖賊而令良玉以兵會恂良玉畏自成遷延不至上終不能罪也 八月庚戌安慶兵變殺都指揮徐良憲巡撫徐世廕討定之 乙丑釋黃道周于戍所復其官道周戍已經年一日上御經筵召輔臣入文華後殿手一編問曰張溥張采何如人也皆對曰讀書好學人也又言溥已死采亦未竟其用上曰亦不免偏時周延儒以楊嗣昌已前死而已方再入相

欲參用公議爲道周地卽對曰張溥黃道周皆未免偏徒以其善學故人人惜之上嘿然蔣德璟吳牲亦以爲言且述其清苦上微頷之明日卽有是命道周旣還召見因泣曰臣不自意今日復得見陛下臣故有犬馬之疾願乞假歸許之 丁卯下陳新甲于獄先是松錦之失張若麒逃還言官劾若麒者悉及新甲新甲屢乞罷不從新甲雖有才曉邊事然不能持廉所用多債帥深結中貴爲援與司禮王德化尤昵故言者攻之皆不能入當是時闖賊蹂躪河南開封屢被圍他郡縣失亾相繼總督傅宗龍汪喬年出關討賊先後陷沒賊勢愈張

言官劾新甲者章至數十新甲請罪章亦十餘上輒慰
留之至是上特惡其洩機事遂下吏初上以和議委新
甲手詔往返者數十皆戒以勿泄外廷漸知之故屢疏
爭然不得左證一日所遣職方郎中馬紹愉以密語報
新甲會新甲視事去寘其書几上家僮誤以爲塘報也
付之鈔傳于是道路譁然給事中方士亮首論之上愠
甚留疏不下已降嚴旨切責令新甲自陳新甲不引罪
反自詡其功上益怒言官復相繼劾之遂逮付刑部獄
而和議亦中罷新甲從獄中上書乞宥不許新甲知不
免徧行金內外給事中廖國遴等營救于刑部侍郎徐

石麒拒不納輔臣周延儒陳演亦于上前力救且曰國法兵不薄城不殺大司馬上曰它且勿論辱我親藩不甚于薄城邪遂斬新甲于市新甲爲嗣昌引用其才品心術相似軍書旁午裁荅無滯上頗倚之後給事中沈迅力詆其失上曰令爾作新甲恐更不如迅慚而退是月改刑部尙書鄭三俊于吏部召前南京尙書范景文代之劉宗周召爲吏部侍郎未至擢左都御史力辭有詔敦趣踰月入見始受事 九月壬午李自成決河灌開封時諸援軍潰于朱仙鎮上乃詔山東總兵官劉澤清救開封城被圍久食盡巡撫高名衡總兵陳永

福等猶固守澤清兵抵河北朱家寨將士不敢進澤清
曰我以兵五千南渡依河而營引水環之以次結八營
直連大堤築甬道輸河北之粟以餉城中賊兵已老可
一戰走也皆曰善乃分兵先渡立營賊攻之戰三晝夜
後軍無繼者甬道不就澤清拔營去賊圍開封者三所
損傷多積憤誓必拔之圍半年師老糧匱欲引黃河水
灌之以城中子女貨寶猶豫不決聞秦督孫傳庭已率
兵出關恐諸鎮兵夾擊欲變計會有獻計請決河以灌
賊者名衡然之周王恭柎募民築羊馬牆堅厚如高岸
賊營直傅大堤河決賊可盡城中無虞方鑿朱家寨口

賊已知移營高阜具艤艫巨筏亦驅掠民夫數萬決河灌城會大雨連旬黃流驟漲癸未河決汴梁城圯丁夫荷鋪者隨堤漂沒十數萬賊亦沈萬人河入自北門貫東南門以出奔聲如雷名衡永福乘小舟至城頭周王率宮眷及甯陽諸郡王避水棲城樓坐雨絕食者七日後得舟乃從城上泛舟出同知蘇茂灼通判彭士奇久餓不能起竝溺死賊浮艦入城遺民俱盡無所掠乃拔營而西城初圍時百萬戶後饑疫死者十二三汴城佳麗甲中州羣盜心艷之至是盡沒于水得脫者不及二萬人上聞痛悼猶念諸臣堅守勞命叙功加名衡兵部

右侍郎名衡辭以疾卽擢監軍御史王漢代之漢自關
封夜渡河逐賊不利守備李日舒沒于陣諸軍殊死戰
賊敗追至朱仙鎮連戰皆捷遂以代名衡 己丑孫傳
庭帥師赴河南 辛卯鳳陽總兵官黃得功等擊張獻
忠于潛山大敗之得功護鳳陽陵駐定遠時馬士英未
至軍賊悉衆攻桐城挾營將廖應登至城下誘降得功
與總兵劉良佐合兵擊之于鮑家嶺賊敗遁追至潛山
禽斬賊將闖世王馬武三鷄子王興國三鷄子者獻忠
養子號驍勇者也得功箭傷面愈自奮與賊轉戰十餘
日所殺傷獨多賊大覘于是賊渠賀一龍等皆奔獻忠

北投李自成而河南賊袁時中方寇潁州官軍聞警卽
移兵勦時中獻忠收餘衆襲陷太湖參將邱壯猷戰沒
知縣楊春芳典史陳知訓教諭沈鴻起訓導婁懋履並
死焉方賊掠入境知縣李盛英與守備徐際相禦之許

家寨皆力戰死獻忠勢復振

攷異據明史忠義傳載太
湖知縣楊春芳以下四人

三編據之又于質實附載李盛英徐際相二人戰沒于
許家寨云見一統志證之殉節錄二人同賜諡烈愍性
錄言李盛英太湖知縣而是時太湖知縣係楊春芳疑
盛英或前任或後任先後戰死月日無可攷今據質實
增入

是月擢漕運侍郎張國維爲兵部尙書代陳新甲

也國維定戰守賞罰格又列上嚴世職酌推陞慎咨題
等七事皆報可會開封陷條上防河數策上亦納之

冬十月辛酉秦督孫傳庭敗績于邠縣傳廷日夜治軍
爲平賊計詔屢趣之出關乃率兵抵潼關大雨連旬開
封告陷傳庭入河南遂趨南陽時李自成西行逆秦師
傳庭設三覆以待賊分布諸將牛成虎將前軍左勦將
左鄭嘉棟將右高傑將中軍成虎佯北以誘賊賊奔入
伏中成虎還兵而鬥傑等突起翼之勦嘉棟左右橫擊
之賊潰東走斬首千餘級追三十里至邠縣賊弃甲仗
軍資于道秦兵趨利賊覘官兵嚮反兵乘之官兵大潰
副將孫枝秀躍馬以追擊殺賊騎數十賊因圍之馳突
不得出馬蹶被執植立不撓以刃臨之瞠目不荅一人

曰此孫副將也遂殺之參將黑尙仁亦被執不屈死覆
軍數千材官小將之沒者張映奎李栖鳳任光裕戴友
仁以下七十有八人傳庭走鞏縣退入關是役也天大
雨糧不至士卒採青柿以食凍且餒故大敗豫人所謂
柿園之敗也 是月李自成復陷南陽知府邱懋素罵
賊全家被害賊屠其城過扶溝衆議城守舉人劉恩澤
初嘗以策干當事多見用縣令駭不解事恩澤痛哭曰
吾不幸從木偶人死自題樓壁曰千古綱常事男兒肯
讓人明日城陷擲樓下以死版異扶溝劉恩澤殉難事見明史忠義傳系之邱懋
素之下三編記南陽以下
殉難者遺之今摭傳增

十一月丁卯援汴總兵劉

超據永城反初超爲四川遵義總兵嘗從川貴督撫討賊忽上書陳功簿意頗鞅鞅遂坐怨望奪職數求復官不得會李自成圍開封超請招降土寇協擊之乃起超保定總兵令率兵赴援超憚不敢行同縣御史魏景琦方家居見超日與土寇相往來未嘗與自成一戰詆爲通賊超怒愬之舉人喬明楷明楷復譙之超大憤殺景琦一家三十餘人竝殺明楷而反巡撫王漢謀執超揚言招撫分兵伏城下而獨與諸將數騎入超先發殺漢參將陳治邦游擊連光耀父子格鬥死有馬魁者負漢尸奪路以出聞于朝詔鳳督馬士英太監盧九德總兵

陳永福討之超據永城城中先以禦賊故屯糧積芻製火礮至是盡爲超有官兵連戰不克築長圍困之庚午發帑振開封被難宗室兵民 壬申

大清兵分道入塞薊州告急是時關內外竝建二督又分設二督于昌平保定千里之內有四督臣又有甯遠永平順天密雲天津保定六巡撫甯遠山海中協西協昌平通州天津保定八總兵星羅棊置防兵益衆而事權不一薊督張福臻尤昏庸給事中方士亮劾之因言移督師關內則薊督可裁福臻可罷于是召還福臻令遼督范志完兼制關內移駐關門志完辭不許求去不

許上疏言不能兼薊請仍設薊督始以趙光抃任之而
大清兵已自牆子嶺青山口等處入京師戒嚴命勲臣
分守九門中官王承恩督察城守詔舉堪督師大將者
戊寅徵諸鎮入援庚辰

大清兵克薊州時援軍漸至皆畏怯觀望不敢戰

大清兵乘勝分趨真定河間等府 戊子張獻忠陷無
爲 己丑遼督范志完入援時

大兵南下兵部劾志完疎防上以敵兵未退責令戴罪
立功然志完無謀畧恇怯甚不敢一戰所在州縣先後

覆沒

閏月

新曆是年
閏九月

壬寅

大清兵自河間南下畿南郡邑多不守遂乘勝抵山東
下臨清諸州縣 癸卯下詔罪已求直言 丁巳起廢
將 是月李自成陷汝甯自朱仙鎮之潰保督楊文岳
候代未行仍督總兵虎大威守汝甯至是賊以數萬衆
來攻老回回馬守應革裏眼賀一龍左金王賀錦爭世
王劉希光亂世王藺養成等皆已歸自成引其衆畢會
壓城五里而軍監軍僉事孔貞會以川兵屯城東文岳
以保兵屯城西賊兵進攻相持一晝夜川兵潰殺傷數
百賊奪其馬騾悉衆攻文岳軍文岳部將甄奇傑者稱
驍勇前從擊賊已戰死所恃惟大威俄大威中礮死守

備蔡浩父子指揮熊應呂梅振英張鴻光俱沒于陣文
岳益不支僉事王世琮知府傅汝爲通判朱國寶總將
士入城副將賈悌參將馮名聖亦掖文岳貞會登城賊
四面環攻戴扉以障矢石雲梯堵牆而立城上矢礮播
石雨集賊死傷山積而攻不休一鼓百道竝登執文岳
及世琮國寶悌名聖殺汝陽知縣文師頤于城上游擊
朱崇祖指揮張國正千戶劉懋勲楊紹祖袁永基同子
世蔭百戶葉榮蔭張承德李衍壽閻宗國竝奮力巷戰
死汝爲聞變投水死歲貢生林景暘國學生趙得庚楊
道臨等諸生趙重明費明棟楊應禎李士諤等皆死賊

擁文岳見自成大罵賊怒縛之城南三里鋪大礮擊之
洞胸糜骨死士民屠僇數萬焚公私廨舍殆盡貞會執
去不知所終崇王由橫崇世子諸郡王皆擄以行世琮
先爲汝甯推官討土寇流矢貫耳不爲動時號王鐵耳
國寶蒞任甫三日皆及于難而崇祖妻孫氏永基妻王
氏皆殉焉賊破汝甯遂走確山信陽泌陽遣其黨賀一
龍等掠地上蔡知縣官篆出禦之與鄉勇馬天祥李和
中王維新曾耀俱陣死 改刑部尙書范景文于工部
時景文尚未任也景文旣調以刑部左侍郎徐石麒陞
任代之 十二月丙寅朔廷杖給事中姜埰行人司副

熊開元于午門皆繫獄初周延儒再相頗力矯其前所
爲廣引清流于是鄭三俊長吏部劉宗周掌都察院范
景文長工部倪元璐佐兵部多起自廢籍其他李邦華
張國維徐石麟等皆布滿九列又請釋黃道周于戍所
復其官言路亦得發舒論事忌者乃造二十四氣之說
以指朝士二十四人直達御前時適下詔戒諭百官責
言路尤至採疑上已入其說乃上言陛下視言官重故
責之嚴如聖諭云代人規卸爲人出缺者臣敢謂盡無
其事然陛下何所見而云然倘如二十四氣蜚語騰播
清禁此必大奸巨慝恐言者不利已而思以中之激至

尊之怒箝言官之口人皆喑然緘默誰與陛下言天下事者是時上方憂勞天下默告上帝戴罪省愆所頒戒諭詞旨哀痛讀者感傷採顧反覆詰難若深疑于上者上遂大怒曰採敢詰問詔旨藐玩特甚立下詔獄拷訊掌鎮撫梁清宏以獄詞上上曰採情罪特重且二十四氣之說類匿名文書見卽當毀何故屢騰奏牘其速接實以聞而同時有能開元者亦奉詔下錦衣衛獄開元初以給事中左降淹久不遷頗缺望詣延儒訴已困頓狀延儒適以他事輒命駕出開元大愠會京師戒嚴上下詔求言凡官民陳事者卽日召對開元欲論延儒屢

請召對及入見延儒同在不敢言一日上御德政殿秉燭坐開元從輔臣入奏言易稱君不密則失臣臣不密則失身請輔臣暫退延儒等引退者再上不許開元遂言陛下求治十五年天下日以亂必有其故上曰其故安在對曰今所謀畫惟兵食賊寇不揣其本而末是圖雖終日夜不寢食求天下治無益也陛下臨御以來輔臣數十人皆庸人相繼爲奸人禍天殃迄無衰止迨言官發其罪狀誅之斥之已敗壞不可復救矣上與詰問久之疑開元有所爲曰爾意有人欲用乎開元辨無有且奏且頰目延儒延儒跪謝上曰天下不治皆朕過于

卿何與開元言陛下令大小臣工不時面奏而輔臣在左右誰敢爲異同之論以速禍且昔日輔臣繁刑厚斂屏棄忠良賢人君子攻之今輔臣奉行德意釋纍囚蠲逋賦起廢籍賢人君子皆其所引用偶有不平私慨歎而已上責開元有私開元辨延儒等亦前爲辨解上命之退延儒等請令補牘從之開元本欲盡發延儒罪以其在側不敢言而延儒慮其補牘陰令吳昌時等沮之及奏上止述奏辭不更及延儒他事上大怒令錦衣逮治衛帥駱養性開元鄉人也素怨延儒令盡發延儒之隱以聞上益怒密旨下養性令潛斃塚及開元于獄養

性懼以語同官同官曰不見田爾耕許顯純事乎養性
乃不敢奉命已而語洩有奏之上者請並誅養性養性
大懼上亦不欲殺諫臣疏竟留中會鎮撫再上塚獄言
掠訊者再供無異詞養性亦封還密旨乃命移刑官定
罪尙書徐石麒麟等擬塚戍開元贖徒上責以徇情飭法
令對狀奪石麒麟官而逮塚開元至午門並杖一百塚已
死塚弟塚口溺灌之乃復蘇仍繫刑部獄致異姜熊二
人下獄廷杖
事見明史本傳三編系之閏十一月据下錦衣衛獄也
此獄始下錦衣劉宗周率廷臣力爭之上怒乃移之刑
部而先予廷杖也劉宗周以十二月削籍而徐石麒麟亦
奪官皆以論救二人予輕比故也宗周論救明史本傳
特書于閏月之晦而開元傳特書二人廷杖于十二月
之朔兩傳相枝其因宗周論救及石麒麟擬輕比而杖之

明矣今統系之
十二月朔下

己巳李自成陷襄陽先是左良玉自
朱仙鎮南濱退屯襄陽大治戰艦于樊城驅襄陽一郡
人以資軍降賊附之有衆二十萬然親軍愛將大半死
而降人不奉約束良玉亦漸衰多病不復能與自成角
自成乘勝攻良玉趨白馬渡良玉移營南岸結水寨相
持扼之淺洲賊兵十萬爭渡不能遏良玉乃拔營宵遁
引舟師南下走武昌從楚王乞二十萬餉曰我爲王保
境王不應縱兵大掠火光照江中宗室士民奔竄至山
谷多爲土寇所害驛傳道王揚基奪門出良玉兵掠其
貲竝及其子女時士民畏良玉兵甚于賊賊旣得渡遂

長驅犯襄陽官吏皆先遁賊入城鄉官故羅平知縣蔡
思樞故福建通判宋大勛殉節死賊分兵寇宣城知縣
陳美固守八晝夜城陷抗罵不已爲賊磔死訓導田世
福亦死之寇棗陽知縣郭裕發礮石擊傷多賊憤攻益
力城陷身被數槊大罵賊支解之闔門遇害寇光化甫
薄城知縣萬敬宗遂自盡賊義之城獲全鄉官故長蘆
鹽運使韓應龍自縊死寇穀城知縣周建中死之寇均
州知州胡承熙被執不屈與其子爾英俱死承熙有能
聲遷刑部員外郎未行遇難寇鄖陽同知劉璇死之寇
保康知縣萬惟壇與妻李氏死之寇荆門攝州事承天

府同知盧學古誓死守學正張郊芳訓導程之奇亦盟諸生子大成殿佐城守賊環攻四日無援城陷學古罵賊不絕口剖腹而死郊芳之奇亦不屈死州同知沈方一門十八人皆遇害賊已陷荆門遂合兵向荊州巡撫陳睿謨急渡江入城奉惠王常潤南奔監司以下皆奔士民遂開門迎賊湘陰王儼伊遇害訓導撤君錫正衣冠坐明倫堂賊至欲屈之詬罵死賊大索縉紳故相張居正子尙寶丞允修不食死尸部員外郎李友蘭不屈死諸生王維藩率妻朱氏及二女避難爲賊所掠令妻女赴井死遂見殺諸生王圖南被執罵賊死夷陵鄉官

故潁州知州李雲在州有惠政州人建祠祀之謝事歸
大書名義至重鬼神難欺二語于牖城陷不屈執至江
陵絕食死歸州千戶呂調元率部卒格鬥陷重圍中招
之降大罵亂刃交下死 癸酉

大清兵攻兗州知府鄧藩錫走告魯王以派曰郡有吏
國有王猶同舟也列城失守皆由貴家惜金錢而令饑
人餓夫列陣扞禦夫城郭者我之命也財賄者人之命
也我不能畀彼以命而望彼畀我以命乎王誠散積儲
以鼓士氣城猶可存不然大事一去悔無及矣以派不
能從藩錫與監軍參議王維新同知譚絲曾文蔚通判

閻鼎推官李昌期滋陽知縣郝芳聲副將丁文明長史
俞起蛟給事中范淑泰等分門死守力不支城破文明
戰死維新猶奮力格鬥被二十一創乃死魯王自縊樂
陵陽信東原安邱諸郡王皆死藩錫綵文蔚鼎昌期芳
聲起蛟淑泰舉人羅于立竝殉節淑泰方典浙江試歸
遂及于難三編質寶魯王以派荒王檀十世孫樂陵魯
靖王肇輝第五子泰舉于宣德二年始封樂
陵郡王至是爲泰舉八世孫以泛陽信魯莊王陽鑄第
七子當潛于成化十四年封陽信郡王至是爲當潛七
世孫宏楮東原魯端王觀旋第二子顯瑜于嘉靖三十
六年始封東原郡王至是爲顯瑜曾孫以源安邱魯靖
王肇輝第四子泰于宣德十年始封
安邱郡王至是爲泰于九世孫宏楨

大清兵遂連下山東州縣直抵海州顏榆沭陽豐沛所

在將吏多望風遁或獻金帛迎降皆下之

攷異

清兵入塞始大

于十一月下河間真定等府閏月由臨清抵山東而山

東兗州之下三編特書云時十二月八日也史稿書之

癸酉卽十二月初八日今從之至由山東直下應天諸

州縣皆在是年十二月內明年始自登萊北歸今分書

之 癸巳李自成燔獻陵守陵巡按御史李振聲總兵

錢中選皆降遂攻承天

攷異

據明史宋一鶴傳振聲等

振聲不脂人與自成同里同姓自成呼之爲兄後復殺

之據此則振聲中選皆降賊者而史稿乃入二人于死

事之列大誤今

據一鶴傳書之 是月左都御史劉宗周削籍宗周甫

起廢籍既至官召見文華殿上問都察院職掌何在對

曰在正己以正百寮必存諸中者上可見君父下可質

天下士大夫而後百寮則而象之大臣法小臣廉紀綱

振肅職掌在是而責成巡方其首務也巡方得人則吏治清民生遂上曰卿力行以副朕望宗周以敗書屢聞請旌死事廬象昇而追戮誤國奸臣楊嗣昌逮跋扈總兵左良玉俾督師大帥皆知懲勸上不能從閏月晦日召見廷臣于中左門時姜燦熊開元以言事下詔獄宗周約九卿共救入朝聞密旨置二人死宗周愕然謂眾曰今日當空署爭必改發刑部始已及入對有薦西洋人湯若望善火器者請召試宗周曰邊臣不講戰守屯戍之法專恃火器近來陷城破邑豈無火器然我用之制人人得之亦可制我不見河間反爲火器所誤乎國

家大計以法紀爲主大帥跋扈援師逗遛奈何反姑息
爲此紛紛無益之舉耶因議督撫去留則請先去督師
范志完且曰十五年來陛下處分未當致有今日敗局
不追禍始更絃易轍欲以一旦苟且之政補目前罅漏
非長治之道也上變色曰前不可追善後安在宗周曰
在陛下開誠布公公天下爲好惡合國人爲用舍進賢
才開言路次第與天下更始上曰目下烽火逼畿甸且
國家敗壞已極當如何宗周曰武備必先練兵練兵必
先選將選將必先擇賢督撫擇賢督撫必先吏兵二部
得人宋臣曰文官不愛錢武官不惜死則天下太平斯

言今日鍼砭也論者但論才望不問操守未有操守不
謹而遇事敢前軍士畏威者若徒以議論捷給舉動恢
張稱曰才望取爵位則有餘責事功則不足何益成敗
哉上曰濟變之時先才後守宗周曰前人敗壞皆由貪
縱使然故以濟變言愈當兼重操守上曰大帥別有才
局非徒操守可望成功宗周曰他不具論如范志完操
守不謹大將偏裨無不由賄進所以三軍解體由此觀
之操守爲重上色解曰朕已知之命宗周起于是宗周
出奏曰陛下下方下詔求賢姜採熊開元二臣遽以言得
罪下錦衣獄陛下度量卓越妄如臣宗周顛直如臣黃

道周尙蒙使過之典二臣何不幸不邀法外恩上曰道周有學有守非二臣比宗周曰二臣誠不及道周然朝廷待言官有體言可用用之不可置之卽有應得之罪亦當付法司今遽下錦衣獄終于國體有傷上怒甚曰法司錦衣皆刑官何公何私且罪一二言官何遽傷國體有如貪贓壞法欺君罔上皆不可問乎宗周曰錦衣膏梁子弟何知禮義聽寺人役使卽陛下問貪贓壞法欺君罔上之臣亦不可不付法司也上大怒曰如此偏黨豈堪憲職有間曰開元此疏必有主使疑卽宗周金光長爭之上叱光辰并命議處翼日光辰貶三秩調用

宗周革職下刑部議罪閣臣持不發捧原旨御前懇救
乃免斥爲民 召南京左都御史李邦華爲都察院左
都御史竝督東南援兵入衛 是歲李自成攻陷開封
一時精銳悉聚河南墮名城不勝計河南凡八郡三在
河北自六年蹂躪後患少紓其南五郡十一州七十三
縣連歲被賊靡不殘破有再破三破者城郭邱墟人民
百不存一朝廷亦不復設官間有設者不敢至其地遙
寄治他所其殉于治所者自南陽知府邱懋素外陷南陽見
上十 鄭州則知州魯世任捍禦力竭被執自刎死新安
則知縣陳顯元以城經摧頽率民人保關門堅守月餘

力竭罵賊支解死登封則知縣劉裡鹿邑則知縣紀懋
勛虞城則署縣事主簿孔亮上蔡則知縣許永禧西平
則知縣高斗垣遂平則知縣劉英魯山則知縣楊呈秀
新野則知縣邱茂表皆殉城死郊縣則知縣李貞佐練
鄉勇守城城陷罵賊斷舌支解死母喬氏亦死汝州吏
目顧王家與子國同擊賊被害教諭雷振揚以貞佐遇
難後攝縣事城再陷死之寶豐則知縣張人龍署縣事
洛陽丞周之德亦以再陷先後死之伊陽則知縣孔貞
璞悉力守城賊不能克既去以事至汝州道遇害一時
鄉官之殉節者陝州故平定知州梁可棟故淮安同知

萬大成

三編一作范

故蓬萊教諭趙良棟息縣故項城訓導

王多福西平故懷仁知縣楊士英而士英子婦王氏亦

罵賊爲所殺邾縣陳心學授知縣不謁選歸賊欲官之

不從遂見殺故內黃知縣周卜慝以父喪歸賊迫使執

邾縣令以代其死罵賊被害南陽舉人張鳳翔王明物

洛陽舉人張民表永城舉人夏云醇商城舉人余容善

光州舉人王者瑄光山舉人胡植嵩縣舉人王翼明寶

豐舉人李得筍皆或捍賊或抗節死之

攷興以上皆是年李自成蹂躪

河南州縣先後殉難諸人三編據明史忠義傳彙書于十五年二月目中惟邱茂表正文漏脫而質實記賜謚諸臣有其名證之殉節錄則茂表時以新野知縣殉難今據增又錄言有陳公者籍貫未詳與茂表光後死節

蓋陳公死難在十六年
新野再陷時也增識之

是歲詔以左印明親授經于

聖人改稱先賢竝改宋儒周二程張朱邵六子亦稱先

賢位七十子下漢唐諸儒之上然僅國學更置之闕里

庠廷及天下學宮未遑頒行也

攷典此据明史禮志在
是年諸儒改稱先賢遂

爲定制
特記之

明通鑑卷八十九

江西永甯知縣當塗夏燮編輯

紀八十九

昭陽協洽
盡一年

莊烈皇帝

崇禎十六年春正月丁酉李自成陷承天先是湖廣巡

撫宋一鶴聞襄陽德安荊州連告陷趨承天護獻陵與

前留守沈壽崇鍾祥知縣蕭漢登陣禦守五晝夜賊以

去年十二月癸巳焚獻陵攻承天至是年正月丁酉正五日也今據明史三編分書之漢聞獻陵

被焚元旦突圍出趨陵賊騎環之漢大呼鍾祥令在誰

敢驚陵者賊挾之去不殺說降不聽城中人有通于賊

者開門延之入城遂陷一鶴壽崇死之鄉官故刑部主
事從所尙與子士默士熊皆不屈死分巡副使張鳳翥
走入山中賊拘漢僧寺謹視之求死不得越三日從僧
榻得剃刀藏之取敝紙書楊繼盛絕命詞紙盡投筆起
復拾土出書鍾祥縣令蕭漢願死此寺十字于壁卽對
壁自刎血正濺字上賊義其死用錦衣斂而瘞之賊退
其門人改斂之以時服曰嗚呼大白其無鬪乎吾師肯
服賊服乎悉易之賊陷承天將發獻陵有聲振山谷懼
而止旁掠潛江京山雲夢黃陂孝感等縣皆下雲夢知
縣湛吉臣署黃陂知縣夏統春潛江鄉官歐陽璵孝感

鄉官故來安知縣程道壽死之統春以黃陂縣丞攝縣事遷麻城知縣未行賊攻城督衆拒守凡十五晝夜賊忽解去統春度賊必至而衆已疲甚休于家越五日賊果突至城遂陷統春巷戰力竭被執欲屈之統春指賊渠大罵賊怒斷其右手復以左手指賊罵又斷之罵不已乃割其舌目怒視皆欲裂又剗其目猶以頭觸賊遂支解之璉官旣貽知縣歸里賊陷潛江被執與妻廖氏同殉節道壽故來安知縣賊陷孝感置掌旅守之道壽結里中壯士擊殺掌旅賊復至杖之繫獄令爲書招程良籌良籌孝感故工部尙書討子也與同邑參政夏時

亨築壘于縣境之白雲山以禦賊賊使說降良箠毀其書賊怒設長圍攻之相持四十餘日賊欲道壽貽書招之降荅曰我不能助良箠殺汝肯助汝邪遂遇害良箠後守德安白蓮寨亦被脅不屈死 庚申張獻忠陷蘄州初良玉避自成東下盡撤湖廣兵自從獻忠聞之乘虛襲陷黃梅廣濟生員張開熙李化龍孫仍盧如鼎殉焉至是薄蘄州知州許文岐方擢督糧參政當行歎曰吾爲天子守孤城三載矣分當死封疆雖危急奈何弃之檄參將毛文富出屯近郊文富劫關廂颺去荆王府將校郝承忠者潛通獻忠導其衆悉力來攻文岐發礮

斃賊頗多夜將半雪盈尺賊破西門入文岐巷戰雪愈甚礮不得發與指揮岳壁同被執獻忠欲脅兩人降壁厲聲曰我世臣也城亾與亾豈降哉賊乃殺壁而羈文岐于後營盡屠州民鄉官故監察御史饒京故江西布政張邦翼故山西按察副使李樹初故遵化兵備副使李挺故陝西僉事李新故印江知縣董一化皆死之新舉家被執賊欲屈之新叱曰我昔官秦中爾輩方爲厮養今日肯屈膝厮養邪賊怒新抱父屍就刃賊繫文岐與舉人奚鼎鉉等數十人俱文岐密謂曰觀賊老營多烏合凡此數萬賊皆被掠良民若告以大義同心協力

賊可殲也陰相結尅期舉事謀洩遇害 是月李自成

前鋒逼漢陽轉攻鄖陽按察使高斗樞游擊王光恩力

守不克乃解去自成遂據承天自號奉天倡義大元帥

號羅汝才代天撫民威德大將軍分其衆曰標營領兵

百隊曰先後左右營各領兵三十餘隊五營以序直晝

夜次第休息巡徼嚴密逃者謂之落草磔之收男子十

五以上四十以下者爲兵凡精兵一人從以主芻掌械

執爨者十人軍令不得藏白金過城邑不得室處妻子

外不得攜他婦人寢輿悉用單布幕綿甲厚百層矢礮

不能入一兵倅馬三四匹冬則以茵褥藉其蹠剖人腹

爲馬槽以飼馬馬見人輒鋸牙思噬若虎豹軍止卽出
較騎射曰站隊夜四鼓尋食以聽令所過崇岡峻坂騰
馬直上水惟憚黃河若淮泗涇渭則萬衆翹足馬背或
抱鬣緣尾呼風而渡馬蹶所墜闕水爲不流每臨陣列
馬三萬名三堵牆前者反顧後者殺之戰久不勝馬兵
佯敗誘官兵步卒長鎗三萬擊刺如飛馬兵回擊無不
大勝攻城迎降者不殺守一日殺十之三二日殺十之
七三日屠之凡殺人東屍爲燎謂之打亮城將陷步兵
萬人環堞下馬兵巡徼無一人得免張獻忠雖至殘忍
不逮也諸營較所獲馬贏者上賞弓矢鉛銃者次之幣

帛又次之珠玉爲下 刑部尙書徐石麒落職至秋始
以張忻代之 二月乙丑朔日有食之 己巳詔薊遼
總督范志完趙光抃會師于平原以

大清兵將北還也先是諸鎮援軍觀望河間不敢救尾
而南已聞塞上警又驅而北廷臣交章劾之乃有是命
三月庚子李自成殺羅汝才并其衆自成不好酒色
甘粗糲而汝才妻妾數十被服紈綺帳下女樂數部厚
自奉養自成嘗唾鄙之汝才衆數十萬用山西舉人吉
珪爲謀主自成善攻汝才善戰兩人相須若左右手自
成下宛葉克梁宋兵強衆附有專制心願獨忌汝才乃

召汝才所善賀一龍卽革裏眼也縛而殺之晨以二十
騎斬汝才于帳中悉兼其衆初自成踞中州所掠城輒
焚燬之及渡漢江謀以荆襄爲根本改襄陽曰襄京修
襄王宮殿居之改禹州曰均平府承天府曰揚武州他
府州縣多所更易又以牛金星言設官爵名號以田見
秀劉宗敏爲權將軍李巖賀錦劉希堯等爲制將軍張
鼐黨守素等爲威武將軍谷可成任維榮等爲果毅將
軍置五營二十二將上相左輔右弼六政府侍郎郎中
從事等官要地設防禦使府曰尹州曰牧縣曰令封崇
王由楨及郡王被執者俱爲伯官吏降者並受僞職僞

侍郎喻上猷薦所知李開先陟萬策賢可用具書幣徵之開先觸牆死萬策自經自成既殺汝才一龍尋又襲殺藺養成奪馬守應兵于是十三家七十二營諸大賊降及死者殆盡而自成獻忠二人獨存 壬寅命大學士吳甡督師討賊上以襄陽荊州承天連陷召對廷臣隕涕謂甡曰卿向歷巖疆可往督湖廣師甡具疏請得精兵三萬自金陵趨武昌扼賊南下上方念湖北覽疏不悅留中甡請面對上以所需兵多猝難集南京隔遠不必退守甡奏言左良玉跋扈甚前督師楊嗣昌九檄徵兵一旅不發臣不如嗣昌而良玉據江漢甚于曩時

臣節制不行徒損威重南京從襄陽順流下窺伺甚易
宜兼顧非退守也大學士陳演言督師出則督撫兵皆
其兵甞言臣請兵正謂督撫無兵耳使臣束手待賊事
機一失有不忍言者上乃令兵部速議發兵尙書張國
維請以總兵唐通馬科及京營兵共一萬畀甞又言此
兵方北行俟撤備後始可調上命姑俟之甞屢請上曰
徐之撤備則兵自集卿獨往何益已而甞卒不行 丁
未流賊陷武岡州賊黨馬守應初陷澧州窺常德土寇
王明揚等應之攻破武岡縱掠岷邱岷王企鵠遂遇害
生員袁承孟率子斐麟督鄉兵勦之爲賊所蹙投潭水

死夢麟戰沒先是湖南土寇有飛天王江長子洪老赦者橫行湘鄉安化益陽甯鄉間犯湘潭長沙總兵尹先民合兵勦之戰桃花江陣斬飛天王俘江長子洪老赦溺死賊悉定而臨武劉新宇藍山李荆楚復大熾謂之臨藍賊據山砦納亡命同出犯常德衡州圍桂陽州先民率裨將貢王猷土司譚仰庭來援圍始解尋以二百餘艘由衡漕犯長沙攻十餘日不克乃引去轉攻袁州直逼永州將由東安水道闖入廣西于是合湖廣廣東廣西福建兵會勦沈撫陳睿謨檄先民將主客兵萬五千人討劉新宇敗賊梁橋用計縛新宇誅之餘賊推

新宇弟秀宇爲主嬰險阻以拒官軍官軍四路奪隘入直抵其巢禽秀宇廣東廣西福建兵分道入藍山藤木軫騎不得進遂縱火焚之乘煙而上先後殺賊首曾成奴郭子奴等李荆楚就縛臨藍賊平而諸盜時竊發患不得息及是竟陷岷嶺藩勢張甚巡按御史劉熙祚馳擊甘明揚于常德破其衆斬明揚方還兵長沙而獻賊已臨江欲渡湖南大震 張獻忠陷黃州獻忠自斬擁大衆入黃州同知朱統鏘禦之沒于陣黃民多弃家逃乃驅婦女剗城尋殺之以填塹黃岡知縣孫自一縣丞吳文燮衛指揮郭以重俱死之以重本州人世職聞城陷

自他所來赴難其妻止之叱曰朝家畀我十三葉金紫不能易一死哉既至遇賊欲脅之去堅不從露刃懼之乃好謂賊曰從汝非難但抱呱呱兒者吾妻也汝爲我殺之吾無累矣賊如其言以重卽奪賊刃擊斬一賊羣賊擁至遂投水死鄉官故福建兵備副使樊維城舉人於斯行武舉王子監生員易道暹馮雲路史之見汪延陞義民余季負曹上謨曹大震並先後不屈死道暹家藏書不忍弃子爲瑚奉母走青峯巖道暹攜幼子爲璉據書以行遇賊欲屈之大罵爲璉請代遂並殺之未幾爲瑚亦被殺

攷異易道暹據明史忠義傳增證之樓山詩集卽是年賊陷黃岡時事也雲路

從故大學士賀逢聖講學賊將渡江雲路貽書逢聖曰
在內以甯湖爲止水在外以漢江爲汨羅甯湖者雲路
談經處也城旣陷乘桴入甯湖賊遣使來聘投湖死賊
分兵攻黃陂麻城黃陂知縣趙元有主簿薛聞禮生員
傅可知俱先後死難聞禮當歲歉民逋漕粟聞禮貸所
知得千金以代民逋賊陷黃陂愛其才挾與俱去暮卽
亾歸殺賊所置僞官令士民遠避挺身任之遂被殺可
知以孝稱賊執之憐其年老不殺令飼馬罵賊被害湖
南將馬人龍援麻城戰沒有大姓奴湯志者殺諸生六
十人以城降署縣事教諭蕭頌聖死之獻忠乃改麻城

爲州是時黃州屬邑皆陷蕪水縣丞吳文奕教諭孫瑋
訓導童天申羅田守將郭金城生員王邦衡與其子鯉
竝殉節獻忠旣破蕪黃遂引兵而西 是月左良玉軍
作亂良玉旣縱掠武昌居二十餘日李自成前鋒逼漢
陽乃避之東去居人登蛇山以望叫呼更生日左兵過
矣良玉所部多降兵叛卒桀悍不馴裨將王允成爲亂
首擁兵十餘萬自九江而下破建德劫池陽去蕪湖四
十里泊舟三山荻港漕艘鹽舶盡奪以載兵聲言餉乏
欲寄孥南京南京文武大吏相顧愕眙陳師江上爲守
禦士民一夕數徙商旅不行都御史李邦華被召道湖

口歎曰中原安靜土東南一角耳身爲大臣忍坐視決裂袖手而去卽草檄告良玉以危詞動之良玉氣乃沮邦華用便宜發九江庫銀十五萬餉之而身入其軍開誠慰勞一軍稍安 夏四月丁卯輔臣周延儒自請督師時

大清兵畧山東還至近畿上憂甚吳姓方奉命入湖廣延儒不得已自請視師上大喜降手敕獎以召虎裴度賜章服白金文綺上賜給金帛賞軍延儒遂行駐通州

辛卯

大清兵北歸是春

大清兵自山東還過登萊陷萊陽入直隸界陷順德府
兵迫近畿諸援軍亦隨而北終未敢一戰給事中熊汝
霖因言兵入墻子嶺以來南北往返諸軍謹隨其後如
斯隸之于貴官負弩前驅望塵莫及何名爲將何名爲
督師上深然之汝霖又言外縣難民紛紛入都不云被
兵而云避援軍兵破霸州未嘗殺僇百姓援軍繼至遂
無子遺朝廷歲費數百萬金錢以養兵豈欲毒我赤子
上惡其語激謫爲福建按察使照磨而近畿烽火日亟
周延儒至通州亦不敢戰惟與幕下客飲酒娛樂而日
騰章奏捷及是

大清兵至懷柔趙光朴合唐通白廣恩等八鎮兵邀戰

于螺山

山在懷柔縣北

皆潰總兵官張登科和應薦敗沒大同

參將吳希稷守備張爾塾亦先後死之

大清兵之南下也自去冬至是夏所過畿輔山東應天

及自山東北還凡克府州縣城八十八一時官吏死于

戰守及紳士之殉節者畿輔則薊州兵備僉事張名世

及其子啟元管薊鎮糧儲戶部主事馬嗣休與其母薛

氏霸州兵備副使趙輝與其子琬知州丁師羲里居參

政李時芄河間參議趙挺一門十四人督守給事中周

而溍知府顏孕紹爲復聖六十五代孫闔門自焚同知

姚汝明與妾任氏知縣陳三接與妻武氏里居襄陽知

縣賈太初訓導馮運隆順德知府吉孔嘉與妻張氏長

子惠迪次子婦王氏里居台州知府傅梅中書舍人孟

魯鉢張鳳鳴定州知州唐炫趙州知州王端冕

致異此所記自

十五年冬彙書之而趙州于十一年十五年凡兩失端

景之死明史吉孔嘉傳在十五年克趙州下三編于十

一年十五年重複書之今教諭陳廣心訓導王一統承

以所書十五年者爲正清知縣高維岱典史李自正教諭邸養性鄉官劉維蕙

阜城知縣呂大成武邑知縣鄭集命沙河知縣項易任

縣守備牛文科深州訓導劉名言吏目熊國俊平鄉教

諭潘希明訓導李愈芬閭慎行清豐教諭曹一貞訓導

董調元里居吏部郎李其紀黃州推官侶鶴舉富陽知縣杜斗愚永平里居山東副使申爲憲新河里居淮安通判劉文蔚韓城縣丞趙懋誠生員宗文麗南樂監生鄭獻書山東則山東兵備僉事樊吉人登萊兵備僉事邢國璽兗西兵備僉事李恪臨清總兵官劉源清澤清弟也參將柳毓融權關主事陳興言同知路如瀛判官徐應芳吏目陳翔龍里居故兵部侍郎張宗衡三編質實故宜大總督罷歸佐有司守城接絕死太常少卿張振秀戶部員外郎邢泰吉臨汾知縣尹任濱州知州王道隆莒州知州景淑範貢生何燧鄒平知縣朱迴添萊蕪知縣馮守禮與二子

摠抱摠竒陽信知縣張予卿滕縣知縣吳良能與其家

屬質實城將破盡殺家前知縣瞿騫質實解任未行與良能協守城破亦

死里居車駕郎中劉鴻緒東阿知縣吳汝宗武城知縣

任萬民生員商酌儒商大儒徐行泗徐士雅王國俊吳

文光臨淄知縣文昌時質實闔門自焚訓導申周輔高苑知縣

周啟元壽光知縣李耿里居桐柏縣知縣丁茂桂萊陽

知縣陳顯際里居禮科都給事中沈迅與弟迕闔門死

工部侍郎宋致與其族叔稽勳郎中宋應亨中書舍人

趙士驥質實應亨以城北庫薄出千金建甌城決旬而畢致及同邑趙士驥亦出貲治具與顯際固守

二月餘城破皆死之齊東教諭張日新與妻方氏子光裔邑人安

守夏

質實日新招降土寇安守夏共登陴拒守力不支與子光裔及守夏皆死妻方氏自刎

沂州

里居河南巡撫高名衡夫婦

質實名衡以巡撫守開封既陷以病歸夫婦同死節

壽張里居太僕少卿王大年

質實以附魏忠賢批名逆案至是亦死

曹州

里居戶部主事楚煙與子鳳苞妻趙氏長清里居訓導

張肇祚昌邑舉人李治躬宋明佐生員宋奇英宋奇士

諸城舉人丁大澂新城武舉馬驥貢生王與朋生員王

與斌王與玖王與才王與蓋王與獻王與璧王與纓王

與滿王士駒王士奇王士瞻畢申畢卓耿廷梓張嗣說

徐瀄如張炅然張炳然張熒然張沖然泰安州生員張

遇留平度州生員竇啟光城武生員劉珣堂邑生員孫

法祖夏津生員劉以楷戴章甫朝城生員岳爾高卽墨
生員王基招遠生員單經翰應天則豐縣知縣劉光先
生員王道充與子賓布衣皇甫世民沐陽知縣劉士璟
等而南京給事中張焜芳罷官歸會稽以事北上過臨
清與甯波生員馬之騮馬之駒俱被執死焜芳妻妾在
家聞之亦赴井死天津參將賀秉鉞扶父柩過臨清巷
戰終日力盡被執職方主事劉大年道出厯城亦皆殉
節死之 是月鳳督馬士英討劉超平之初超官貴州
與士英相識乃緣舊好貽士英書曰今文臣軫結勢成
綱不可拔爲守令則驅民反爲督撫則驅兵反爲臺省

則驅將反天下反者何一非此等驅之超非侂愚豈願
弃功名捐首踵蒙不韙之名蹈汙敗之行爲天下笑哉
勢激使然也士英得書因勸之降超出見不肯去佩刀
士英笑曰若旣歸朝安用此已潛去其親信執之俘于
朝磔死 五月癸巳朔張獻忠陷漢陽武昌大震 壬
寅周延儒還京師時

大清兵已北還延儒乃言兵退請下兵部議將吏功罪
遂歸繳上督師敕上令藏貯以識勲勞論功加太師蔭
子中書舍人賜銀幣蟒服延儒辭太師許之 丙午以
修撰魏藻德爲少詹事兼東閣大學士預機務藻德以

十三年舉進士既殿試上思得異才復召四十八人于
文華殿問方畧藻德口才捷給自叙十一年佐有司守
通州功上善之擢置第一授修撰及都城戒嚴疏陳兵
事又召對稱旨上意其有抱負擢禮部右侍郎兼東閣
大學士入閣輔政藻德力辭部銜乃改少詹事正統末
年兵事孔棘彭時以殿試第一人踰年卽入閣然以原
官預機務未有超拜大學士者陳演見上遇之厚曲相
比附八月補行會試引爲副總裁越蔣德璟黃景昉而
用之藻德居位一年無所建白但倡議令百官捐助而
已 戊申大學士吳甡罷甡督師湖廣以俟北兵未行

未幾周延儒督師通州朝受命夕啟行輔臣蔣德璟謂
尙書倪元璐曰上欲吳公速往緩言相慰者試之耳觀
首輔疾趨可見姓遲回不克行而部所撥唐通兵陳演
又以關門不可無備請留之姓不得已至是辭朝先一
日出勞從騎上猶命中官賜銀牌給賞越宿忽下詔責
其逗留命輟行入直姓皇恐兩疏引罪遂許致仕丁
巳周延儒罷初上遣廠衛緝事延儒再相奏罷之于是
廠衛以失權胥怨延儒又倣同官陳演演銜次骨掌錦
衣者駱養性延儒所薦也養性狡很背之至是延儒自
通州還居數日養性與中官盡發所刺軍中事上大怒

責延儒蒙蔽推諉下廷臣察議演等公揭救之延儒席藁待罪自請戍邊上猶降溫旨言卿報國盡忱終始勿替許馳驛歸賜路費百金以彰保全優禮之意及廷臣議上上復諭延儒功多過少令免議延儒遂歸 壬戌

張獻忠陷武昌先是獻忠將渡漢前撫宋一鶴既死代者久不至武昌知府江夏知縣竝以朝覲行楚府左長史徐學顏攝縣事急修守具然武昌素不宿重兵城中空虛或議撤江上兵以守參將崔文榮曰守城不如守江江中鴨蛋諸洲淺不及馬腹縱之飛渡而坐守孤城非策也當事不從賊已渡江陷武昌縣殺知縣鄒逢吉

縣無人賊出營樊口文榮軍洪山寺扼之既歛兵入城以它將代守賊全軍由鴨蛋洲畢渡抵洪山守將亦退入城文榮偕里居大學士賀逢聖固守賊攻之不能下監軍參政王揚基時已擢僉都御史巡撫承天德安二郡未聞命尙駐武昌見勢急與推官傅上瑞詭言有事漢陽開門遁去人情益洶洶先是逢聖詣楚府乞發帑募士楚王華奎出太祖所分金裏交椅一于庭曰惟此可作軍需耳他何有逢聖哭而出及寇警日亟始出資募兵應募者率斲黃潰卒及賊間諜反開門納賊文榮方出門還闔城扉不及躍馬大呼殺三人賊攢槊刺之

洞冒死學顏格鬥斷左臂大罵不屈爲賊支解死一家
二十餘人皆殉焉逢聖被執叱曰我天朝大臣若輩敢
無禮賊麾使去投水死逢聖妻危氏子覲明光明子婦
曾氏陳氏孫三人先期載舫艤出墩子湖鑿其舫艙俱
溺死武昌通判李毓英教諭王會篇衛經歷汪文熙江
夏巡檢戴良瑄及僧官一人皆殉城抗節死之文熙汪
下三人明史忠義鄉官故廣西布政吳思溫故鳳翔知
傳殉節于武昌縣府舒顯應故霍山知縣貢其志保舉知縣傅如珪故指
揮千戶張鳴錦舉人謝濱培貢生何應軫生員熊霏霏
覽及諸書皆作妻霏明睿皆不屈死霏黃岡人移居武昌喜邵子

皇極書頌言未來事前一日貽書友人曰明日當覓我
某樹下及期行樹傍賊追至躍入河池以死瘡當城破
賊獨不入其門慨然曰安有父母之邦淪覆而偷生苟
活者與妻及二子二女諸婢以次投井死時人號爲明
井都司徐至美守黃鶴樓重創死又有巡江都司朱士
鼎城陷被執賊喜其勇欲降之士鼎執手大罵賊斷右
手乃以左手染血灑賊賊又斷之不死賊退令人縛筆
于臂能作楷字招集舊卒訓練如常賊旣陷楚藩縛楚
王籠之而沈諸江盡殺楚宗室錄男子二十以下十五
以上爲兵餘皆殺之由鸚鵡洲至道士泐浮觜蔽江月

餘人脂厚累寸魚鼈不可食獻忠遂僭號改武昌曰天授府江夏曰上江縣陽楚王第鑄西王之寶偽設尚書

都督巡撫等官開科取士下令發楚耶金振饑民于是斬黃等二十一州縣悉附焉方賊之逼江夏也有大治

人尹如翁逢聖門生也走三百里持一僧帽一袈裟來

貽逢聖逢聖反其衣曰子第去毋憂我如翁去賊陷大治死之逢聖既殉節越百有七十日屍出浮水上面如

生以冬十一月壬子斂大吏葬之江夏縣南之紙坊

吳

壬戌乃五月之晦日也據綏寇紀畧賊以五月初五日自團風渡漢襲武昌縣二十三日全軍渡鴨蛋洲二十五日抵洪山二十九日傅城越日破之明史

本紀蓋據城陷之日書耳今增識紀畧日分

是月命

孫傳庭兼督河南四川軍務尋進兵部尙書改稱督師
加督湖廣貴州及江南北軍務賜尙方劍 吏部尙書
鄭三俊罷三俊爲人端嚴清亮正色立朝惟引吳昌時
爲屬頗爲世詬病時文選缺郎中而昌時以儀制郎中
欲得之首輔周延儒力薦于上且以屬三俊遂請調補
以他部調選郎前此未有也上惡言官不職欲多汰之
嘗以語三俊三俊與昌時謀出給事四人御史六人于
外言官大譁謂昌時素制弄權交章力攻竝詆三俊三
俊懇乞休致詔許乘傳歸同時戶部尙書傅淑訓兵部
尙書張國維皆罷淑訓削職國維以趙光抃事解職尋

下獄已念其治河功釋之尋復故官命以僉都御史馳赴江浙督練兵輸餉諸務踰年甫出都而國難作以李遇知爲吏部尙書倪元璐戶部尙書馮元颺兵部尙書祖制浙人不得官戶部元璐辭不許元璐以軍事急請得參兵部許之會元颺居兵部與元璐同志鉤稽兵食中外想望治平而時事已日亟左支右訕溯自軍興以來三餉竝行黠吏因緣爲奸元璐請合爲一報可又以災傷蠲免計無所出請開贖罪及輸賞給封誥例亦從之是時戶部郎中沈廷揚方議行海運輸之甯遠有成效命元璐酌議每歲糧艘漕與海各相半行焉 六

月癸亥朔詔免直省殘破州縣三餉及一切常賦二年
己卯逮范志完下獄先是志完督師逗留不進次山
東縱兵淫掠爲兵備僉事雷縝祚所劾上令縝祚再陳
志完者首輔周延儒門生也縝祚意有所忌久不奏及
延儒下廷議縝祚乃奏言志完兩載僉事驟陟督師非
有大黨何以至是方德州被攻不下轉攻臨清又五日
志完始至聞後部破景州則大懼欲避入德州城漏三
下邀臣議臣告以督師非入城官薊州失事由援兵內
潰志完不懌而去若夫座主當朝罔利曲庇隻手有燎
原之勢片語操生死之權稱功頌德徧于班聯臣不忍

見陛下以周召待大臣而大臣以嚴嵩薛國觀自待也
臣外藩小吏乙榜孤蹤不言不敢盡言不敢感陛下虛
懷俯納故不避首輔延儒與舉國媚附時局畧進一言
上益心動遂下志完獄 丙戌雷震奉先殿獸吻敕廷
臣修省 秋七月丁酉上親鞫范志完于中左門召雷
縝祚面質其逗留淫掠狀皆實上問縝祚稱功頌德者
誰對曰延儒招權納賄如起廢清獄蠲租皆自居爲功
考選臺諫盡收門下凡求總兵巡撫者必先賄幕客董
廷獻上怒逮廷獻論志完死已又曰志完與趙光抃皆
逗留河間何獨罪志完詎服其心乎遂竝逮光抃 乙

卯上親鞫前文選郎中吳昌時于中左門昌時以周延
儒薦居吏部文選職因之交通內侍把持朝局延儒既
去雷縵祚既糾范志完于是御史蔣拱宸復劾昌時賊
私鉅萬皆連延儒而中言昌時通中官李端王裕民泄
謁機事重賄入手輒預揣溫旨告人事頗有迹上怒甚
乃復御中左門親鞫昌時折其脛無所承怒不解拱宸
面許其通內上察之皆實乃下獄論死始有意誅延儒
初薛國觀賜死人皆謂昌時致之其門人魏藻德新入
閤有寵恨昌時甚因與陳演共排延儒錦衣駱養性復
騰蜚語上乃盡削延儒職遣緹騎逮入京師 己未戒

廷臣母得私謁閣臣 自二月至于 是月京師大疫死
者無算詔發帑療治瘞五城暴骸且命釋輕繫 八月
壬戌朔左良玉復武昌漢陽先是左都御史李邦華入
京師見上論良玉潰兵之罪請歸罪于王允成上乃詔
良玉誅允成而獎其能定變然良玉卒留允成于軍中
不誅也良玉以賊萃湖北不敢嬰其鋒遂留安慶久之
徐濟九江而上當是時獻忠僭號武昌李自成在承天
聞之忌且怒貽之書曰老回回已降曹操輩誅行且及
汝矣獻忠懼又聞良玉將西上乃以前月二日大焚武
昌從咸甯蒲圻而上遂趨湖南良玉于望後始提兵出

湖口至是乘獻忠已去乃殺其僞官吏遂復二郡入武昌城中四十八公署及民居皆燼故禮部侍郎郭正域第獨存乃卽之以立軍府諸郡邑聞而應之楚之下流始稍稍復完 丙寅張獻忠陷岳州先是承天巡撫王揚基自武昌奔入岳州及聞獻忠將入楚南率所部千人自岳州奔長沙推官蔡道憲請還駐岳曰岳與長沙得商也并力守岳則長沙可保而衡永亦無虞揚基曰岳非我屬也道憲曰奔北守南猶不失爲楚地若南北俱奔所屬地安在揚基語塞乃赴岳州及賊入蒲圻揚基卽遁去湖廣巡撫王聚奎遠駐袁州憚賊不敢進道

憲亦請移岳州聚奎不得已至岳數日卽徙長沙道憲
曰賊去岳遠可繕城以守彼犯岳猶憚長沙援若弃岳
長沙安能獨全聚奎不從至是賊果逼岳州沅撫李乾
德總兵孔希貴禦賊于城陵磯三戰三捷殲其前部獻
忠怒百道竝進乾德等不支皆走岳州遂陷獻忠欲渡
洞庭湖卜于神不吉投琰而詢將渡風大作獻忠聯巨
舟千艘載婦女焚之火光燭水夜如晝遂易騎以犯長
沙巡按御史劉熙祚先令道憲募壯丁五千與總兵尹
先民等拒羅塘河聚奎聞賊至大懼急撤兵還城自衛
道憲曰去長沙六十里有險可柵以守毋使賊踰此又

不從丙戌賊薄長沙城士民悉竄聚奎詭出戰遽率所部走湘潭會惠王避地至長沙與吉王謀出奔熙祚奉以奔衡州獨道憲登陴禦守賊遠城呼曰軍中久知蔡推官名速降無自苦道憲命守卒射之斃尋先民出戰敗還賊奪門入先民降道憲被執賊啗以官嚼齒大罵賊曰汝不降將盡殺百姓道憲大哭曰願速殺我毋害百姓時有健卒林國俊李師孔陳賀劉士鳳等

及異諸書賀作

賢又明史忠義傳言林國俊等九人三編據有姓名者四人今從之隨道憲不去賊令說

道憲降國俊等曰主畏死去矣不至今日賊曰爾主不降爾輩亦不得活國俊曰我輩畏死亦去矣不至今日

賊知道憲終不可奪磔之其心血直濺賊面賊將並殺國俊等四人四人憤然曰願瘞主屍而死賊許之乃解衣裹道憲骸瘞之南郊醴陵坡皆自刎里居故給事中史可鏡降賊以爲僞巡撫俾守長沙引兵進薄衡州時王聚奎兵自湘潭先至衡大焚掠桂王及吉惠二王登舟避亂巡按劉熙祚單騎赴永州爲城守計聚奎復避賊走祁陽庚寅賊陷衡州知府張任與賊戰舟中全家被害桂王與吉惠二王奔永州獻忠拆桂府材載至長沙造僞殿而自率兵追三王熙祚乃遣中軍護王等走廣西身自督兵守永州是月督師孫傳庭出師潼關

自閔鄉次陝州檄河南諸軍渡河進勦李自成之據承
天也集牛景星等議兵所向金星請先取河北直走京
師楊永裕請下金陵斷燕都糧道從事顧君恩曰金陵
居下流事雖濟失之緩直走京師不勝退安所歸失之
急關中山河百二宜先取之建立基業然後旁略三邊
資其兵力攻取山西後向京師庶幾進戰退守萬全無
失自成從之初傳庭之敗于柿園而歸陝也力主固守
潼關控扼上游益募勇士使白廣恩高傑將之開屯田
繕器積粟三家出壯丁一製火車三萬輛俟賊間而擊
之會關中頻歲飢苦征繕秦之士大夫以傳庭用法嚴

不樂其在秦相與譁于朝曰秦督翫寇矣咸上章催戰
獨兵部馮元勳持議與傅庭合謂官軍新募未經行陣
宜致賊而不宜致于賊乃于上前爭之曰請先下臣獄
俟一戰而勝斬臣謝之又貽書傅庭戒毋輕戰白高兩
將不可任而廷議趣戰益急上加傅庭督師命速出關
傅庭頓足歎曰奈何乎吾固知往而不返也然大丈夫
豈能再對獄吏乎不得已遂再議出師以總兵牛成虎
將前鋒高傑將中軍王定官撫民將延甯兵爲後勁白
廣恩統火車營自新安來會檄左良玉赴汝甯夾擊陳
永福將河南兵秦翼明將川兵爲犄角是時自成已自

楚至豫盡發荆襄兵令于汜水滎澤伐竹結筏人佩三
葫蘆將謀渡河傅庭分兵防禦遂出關 九月丙申張
獻忠陷寶慶知府李振珽通判何三傑死之振珽弟振
珽僕李六鳳周科徐彩俱殉焉 己亥黃景昉罷操江
故有文武二臣上欲裁去文臣專任誠意伯劉孔昭景
昉爭之尋以召惠世揚爲副都御史久不至命削其籍
景昉論救上不憚遂引歸 辛丑督師孫傳庭復寶豐
先二日師次汝州僞都尉四天王李養純降養純言賊
虛實諸賊老營在唐縣僞將吏屯寶豐自成精銳盡聚
于襄城傳庭如其言遂破賊寶豐斬僞州牧陳可新等

進搆唐縣破之殺賊家口殆盡賊滿營哭乙巳師次郊
縣禽偽果毅將軍謝君友斫賊坐轟尾自成幾被獲遂
奔襄城 庚戌獻忠陷永州巡按御史劉熙祚被執至
衡獻忠據桂王宮叱令跪不屈羣賊自殿城曳至端禮
門膚盡裂使降將尹先民說之終不變遂遇害 辛亥
賜楊廷鑑等進士及第出身有差是春以畿輔有警停
會試八月補行至是始赴廷對 壬子督師孫傳庭兵
潰于襄城時大軍進逼襄城賊懼謀降自成曰無畏吾
殺王焚陵罪大矣姑決一死戰不勝則殺我而降未晚
也而官軍時皆露宿與賊持久雨道瀟糧車不得前土

饑攻邾破之獲馬騾噉之立盡雨七日夜不止後軍譁于汝州不得已退軍迎糧留陳永福爲後拒前軍旣移後軍亂永福斬之不能止賊追及之南陽傳庭令反轡還戰賊陣五重饑民處外次步卒次馬軍又次驍騎老營家口處內官軍力戰破其三重傳庭復麾之進賊驍騎殊死鬥官軍陣稍動降將白廣恩軍將火車者呼曰師收矣脫輓輅而奔車傾塞道馬絀于衡不得前賊鐵騎凌而騰之步賊手白楮遮擊中者首兜鍪俱碎自成空壁躡我一日夜官兵狂奔四百里參將趙希魁戰沒廣恩走汝州高傑隨傳庭走河北至于孟津死者四萬

餘失亡兵器輜重數十萬方傳庭之退兵迎糧也有僞侍郎邱之陶者大學士瑜之子自成陷宜城瑜父民忠仰藥死之陶遂爲所得頗任用至是之陶欲以奇計誤賊遣人間道走武關以蠟丸書貽傳庭曰督師當還兵戰吾詭言左鎮兵大至搖其心彼必返顧督師擊其後吾從中起賊可滅也傳庭大喜報書如其言爲賊邏者所得傳庭恃內應連營前進之陶果舉火報左兵大至自成召而示以傳庭書責其負己之陶大罵曰吾恨不斬汝萬段豈從汝反邪自成怒遂支解之傳庭旣敗遂取饒道過河由山西轉趨潼關是月鳳陽地屢震

冬十月辛酉朔享太廟。丙寅李自成陷潼關督師兵

部尚書孫傳庭死之傳庭退保潼關白廣恩已先至高傑欲弃關徑入西安馮城堅守傳庭曰賊一入潼關全秦糜沸秦人尙爲我用乎已賊攻關廣恩力戰傑以寶豐之敗廣恩先走不救已銜之又憾傳庭不用其言擁衆不顧廣恩戰敗賊獲督師坐纛遂乘勝破潼關官軍大敗廣恩奔固原傑走延安傳庭登陴固守賊分兵從山後遶出其前關城遂陷傳庭躍馬揮刀大呼衝入賊陣與監軍副使喬遷高同戰死衛指揮張爾猷盛昶之李繼祖千戶袁化龍潼關教諭許嗣復皆殉之嗣復分

守關城之上南門城陷被執罵賊死妻女殉焉傳庭之
出師也自分必死顧語妻張氏曰爾若何曰丈夫報國
耳毋憂我後西安破張氏率二女三妾沉于井揮其八
歲兒世甯亟避賊去之兒踰牆墮民舍中一老翁收養
之長子世瑞聞之自代州重趼入秦得夫人屍井中面
如生老翁歸其弟世甯相扶攜還道路見者知與不知
皆泣下傳庭死不得其屍或有言傳庭未死者竟不予
贈廕遷高之死妻史氏子象觀亦聞變自縊死反異謹按殉節
錄傳庭以乾隆四十一年追謚 賊陷渭南知縣楊暄
忠靖自遷高以下皆予謚入祠 方擢兵部主事未行賊至死守舉人王命誥開門迎賊

暄被執索印不予罵賊死教諭張馥訓導蔡其城與瑄分陴固守亦死之鄉官前南京吏部尙書南企仲與子禮部主事居業族子前工部尙書居益家居賊陷城責南氏餉百六十萬企仲年八十三矣遇害賊脅居益居業降不從擁之去加炮烙二人皆不屈絕食七日死故衡州推官鄭君愛亦死焉又陷臨潼鄉官故商邱教諭王佩珂死焉賊又分兵陷華州鄉官故四川恤刑郎中郭宗振故山海關游擊李承燦故甯夏守備薛國蕙偕弟諸生國華皆死之 詔有司以贖錢充餉從戶兵議也 戊辰李自成分遣右營十萬人自南陽攻商州商

雜道參議黃世清馮城守有奸民投賊至城下說降世清伴與語發礮斃之縣其首城上曰懷二心者視此士民皆効死礮矢盡繼以石石盡婦人掘街砌繼之城陷世清坐堂上麾其僕朱化鳳去化鳳願同死一家十三人皆遇害高州諸生邵公坤與弟公巽公佐公齊公量一家死者十八人諸生李本健與弟本深及本深之子諸生呂元聲與其母妻諸生雷堂孫纘文布衣楊名道周揚實等並殉難賊遂屠其城 庚午張獻忠陷常德同知朱國治死之賊發故督師楊嗣昌祖墓斬其尸見血當是時湖南諸郡縣多爲獻賊所破而李自成竊據

承天遣其黨高一功馮雄據襄陽任繼光據荊州蔣養
成牛萬才據夷陵白旺據安陸蕭雲據荊門謝應龍據
漢川賊僞官徧諸郡縣一時楚南北將吏之死于城守
及鄉官士庶不屈死者湖北則援勦都司張應禮均州

布衣李友竹

三編有均州知州胡承熙父子歸州千戶
呂調元夷陵鄉官李雲三人與去年十二

月所記重複
已見上卷

嘉魚知縣王良鑑蒲圻知縣曾棫安陸知

縣濮有容一門十九人江陵知縣袁問科闔門諸生謝

幼安隨州吏目沈元鑑京山典史張自新

質實統民兵
勦賊戰死于

羅漢嶺

諸生李哲應山舉人劉申錫沔陽諸生朱日薦鍾

祥諸生劉振孫雲夢諸生柳宗旦張用晦施爾奇柳列

奎李善昌左璞李聯孝感諸生熊延祚湖南則長沙通

判周二南

質實獄忠遣其黨自興國入境二南出禦于瀏陽之官渡沒于陣

岳州通判

劉璧與子泰

質實擢漢陽知府未行守城力竭被執臨不屈死子泰時年十四亦從父死之

臨

湘知縣林不息

明史忠義傳抗罵不屈斷其兩手殺之

湘陰知縣楊開

明史

忠義傳與家屬十七人投水死

諸生黃鳳德醴陵知縣萬賴擢

擢明史傳作耀

諸生文昌拱甯鄉知縣莫可及與子若鼎若鈺安化知

縣袁繼登

質實擢刑部主事未行城陷被焚死

衡陽知縣張鵬翼與其妻

子

質實賊脅使降不屈縛而投諸江妻子亦赴水死

衡山知縣董我前教諭彭

允中桂東知縣母崇正瀏陽大圍山守備王元封

質實賊犯

境單騎入賊營酣戰馬仆猶步門殺數人死

署武陵縣衡州教授時道亨

明史

忠義傳時作蔣
抱印罵賊死

鄉官故士林苑監正楊鷺諸生周笏柳

之彥益陽教諭賴大雅鄉官故推官陸有光

質實賊陷
長沙執其

母有光親至賊營求釋
其母許之已絕吭而死

諸生易應達巴陵教諭歐陽顯

字質實罵賊
支解死

邵陽教諭王紱諸生劉源澄曾士選劉養

生布衣劉人儼陳邦基長沙縣丞吳士義

質實城陷賊
舉刀相向百

姓號泣爲請命士
義罵不絕口死

武生蕭鍵善化舉人馮一第

質實走
湘鄉乞

師賊執其母與兄招之至長沙
一第就縛罵賊死母兄得免

諸生李有裴東安舉人

唐德明湘潭諸生譚景悅蕭贊黃文炳與子甲譚孔昭

譚思猷與子清遠耒陽諸生謝如珂皆死賊難又獻忠

陷長沙分兵圍參政周鳳歧于澧州城陷被執賊親解

其縛說之降怒罵而死分守湖南參議陳瓊往援亦被執不屈斷手割肝而死于湖南北十五府陷者十三辰州以土司塞辰龍關鄖陽以按察使高斗樞游擊王光恩百計捍禦獨得存然鄖陽四面皆賊中朝謂其已陷不復設撫治是夏斗樞上請兵疏始知鄖存衆議卽任斗樞爲撫治輔臣陳演與之有隙乃擢知府徐啟元僉都御史任之加斗樞太僕寺卿路阻亦不能達也而武昌諸生程天一孝感布衣易道三集鄉勇討賊監軍道王瓚沔陽知州章曠起兵應之斬黃漢三府旋反正會左良玉至立軍府而獻賊已入江西 詔以右僉都

御史何騰蛟巡撫湖廣代王聚奎也騰蛟貴州黎平衛

人 壬申李自成陷西安先是賊自商華逼西安巡撫

馮師孔整眾守禦主城守者爲王根子通于賊射書城

下開東門納之副將劉光先戰不支沈河死師孔及按

察使黃綱長安知縣吳從義秦府長史章尙綱指揮崔

爾達苑馬寺監正游之雲按察經歷楊于邦鄉官故僉

事王徵

輯覽注絕食
死三編佚

故河南參政祝萬齡

質實深衣大
帶趨至關中

書院拜先
聖投緘死

故川北道參議陶爾德故隰州知州周培忠

故懷慶通判賢光儀故芮城知縣徐芳聲故儀封知縣

徐方敬秦府右護衛旗官徐應魁舉人朱誼果席增光

貢生孫孕泰弟孕芳諸生李光信王召俊陳瑞布衣朱恩等皆死之自成執秦王存樞以爲權將軍永壽王存桑爲制將軍布政使陸之祺里居吏部郎中宋企郊提學僉事鞏煇等俱降自成大掠三日改西安曰長安稱西京賜顧君恩女樂一部賞入關策也大發民修長安城開馳道自成每三日親赴教場校射百姓望見黃龍纛咸伏地呼萬歲諸將白廣恩高汝利左光先梁甫先後降陳永福以先射中自成目保山巔不敢下自成折箭爲誓招之亦降獨高傑以竊自成妻走延安爲李過所追折而東渡宜川絕蒲津以守初自成剽掠十餘年

未嘗有大志及席卷湖廣河南始萌竊據之志然地四
達皆戰場所獲郡縣官軍旋復之至是既入秦秦藩富
甲天下府庫貲千萬皆爲所取又據河山百二之險遂
不可制先是戶部尙書倪元璐言天下諸藩孰與秦晉
秦晉山險用武國也請諭二王以勦賊保秦責秦王以
遏賊不入責晉王王能殺賊假王以大將軍權不能殺
賊悉輸王所有餉軍與其資盜賊平益封王各一子如
親王亦足以明報矣二王獨不鑒十一宗之禍乎賢王
忠而熟于計必知所處矣書上不報至是賊果破秦悉
爲賊有焉 劉光先之陣沒也妻王氏投井死一家死

難者五十餘人黃綱光州人崇禎七年賊陷光州綱時以淮海兵備副使丁憂歸方廬墓山中子彘如督家僅巷戰罵賊死綱服除起臨鞏兵備副使大破自成于潼關原至是自成勸之降此之會妻王氏方赴井綱得聞亦投井皆死吳從義練丁壯三百人殺賊城破與崔爾達亦皆投井死未幾朱恩與其弟斗環從子語亦皆死于井自是長安多義井而秦王存樞之降也其妃劉氏獨死之攷異三編据明史諸王傳言王妃劉氏死之緩寇紀畧則云世子妃劉氏聞秦藩陷痛哭曰國破家亡不如一死自成遣歸其家蓋傳聞異詞也今据明史三編章尙綱聞城破投印井中冠服趨王府端禮門雉經周培忠一門殉節李光

信妻熊氏王召俊妻雷氏竝從其夫死陳瑞率二女孫
沈紫潭湖死凡此皆死事之著者 丁丑張獻忠陷吉
安左良玉駐師武昌聞獻忠已入江西遣副將吳學禮
往援江西巡撫郭都惡其淫掠檄之歸自募土人戍守
至是賊至遂陷城吉安通判邵夢河死之尋陷所屬之
吉水安福安福舉人王之爵諸生周國柱吉水布衣徐
士驥竝以捍禦死遂由峽江分宜入袁州分宜貢生張
兆蘭峽江諸生胡若坦死之 是月戶部尙書倪元璐
兼署禮部時林欲楫以致仕去也 十一月癸巳張獻
忠再陷岳州左良玉遣將馬自秀率水師敗之城下尋

遣馬進忠援袁州未幾二城竝復

攷異據綏寇紀畧載良王餘進兵日月狀

中言十月十三日復袁州蓋流賊所陷也又云十一月二十七日再復袁州則張獻忠陷後馬進忠復之也下文又云十二月初二日復萬載入楚境初五日復醴陵二十六等日復長沙湘潭湘陰等縣明史本紀十二月丙戌良王復長沙卽二十六日也今彙載復袁州岳州事而增識日月于此

甲午李自成

陷延安延安副總兵官解文英縣丞姚啟崇死之自成

既盡有西安延安之地乃詣米脂祭奠向爲官軍所發焚弃遺骸築土封之求其宗人贈金封爵以去改延安

府曰天保府米脂曰天保縣清澗曰天波府復以五百

騎西掠鳳翔守將誘而殲之自成怒大發兵往攻典史

董尙質開門迎賊知府唐時明被執至興平乘間自縊

死是時西安諸屬城及延安所部州縣多望風降賊官吏以城守死者惟蒲城知縣朱一統由舉人任官賊至以死自誓或言他州縣甲榜者皆已納款一統曰此事甯論資格邪尋衙兵叛奪印趣迎降一統赴井死白水知縣朱迴澆手弓射賊死教諭魏歲典史劉進皆死焉中部知縣朱新鏢守城有以僞牒招降者碎之令妻妾子女盡縊乃投繯死鄉官則盤屋故雲南知縣袁養和高陵故霸州道參政李喬崑富平故山西參政田時震贈右副都御史朱崇德質實崇德乃山東巡撫國棟之父三原故宣府巡撫焦源清與其從弟故大同巡撫焦源溥故河南巡

撫常道立故冀甯道參政喬魏與外弟王伯達僕王崇

德華陰故高郵知州陳嗣虞蒲城故巡按山東御史王

道純故睢州知州魏國柱耀州故太常卿宋師襄同州

諸生劉長庚鄜州諸生齊大成膚施諸生楊縉徵竝以

不屈死而鳳翔所屬州縣亦叛降賊自隴州同知薛應

珍寶雞知縣唐夢鯤游擊曾榮耀裨將陳奇傑表明岐

山鄉官牛養傑之外質實薛應珍攝州事嘗賊死夢鯤奇傑榮耀表明與賊戰寶雞之賈

村沒無死事者于是賊益恣甚且欲以爲檄定諸邊矣

壬寅祀天于南郊 辛亥以吏部侍郎李建泰副都

御史方岳貢竝兼東閣大學士預機務建泰先官祭酒

有聲望尋擢侍郎至是與岳貢竝以本官入閣岳貢歷
郡守監司以廉能稱召對稱旨超擢副憲未幾有是命
故事閣臣無冠都御史銜者岳貢一人而已 癸丑范
志完趙光抃誅故輔吳甡謫戍甡旣罷歸陳演與錦衣
駱養性交搆之上益怒及周延儒以賄敗上作色曰兩
輔臣負朕朕待延儒厚乃納賄行私罔知國法命甡督
師百方延緩爲委卸地延儒被糾甡何獨無旣而曰朕
雖言終必無糾者錦衣衛可宜甡候旨甡入都敕法司
議罪遣戍金齒南京兵部尙書史可法馳疏救不從
丁巳李自成陷榆林先是總兵王定從孫傳庭出關大

敗奔還榆林遠近震恐自成傳僞檄招降定懼詭言討
套部率麾下兵遁去巡撫張鳳翼甫受命未至城中士
馬單弱人心洶洶兵備副使都任亟集督餉員外郎王
家錄副將惠顯參將劉廷傑等與里居故總兵官尤世
威等議城守衆推世威爲主帥及廷綏相繼陷復遣使
說降廷傑大呼曰長安雖破三邊如故賊皆中州子弟
殺其父兄而驅之戰必非所願榆林天下勁兵一戰奪
其氣然后約甯夏固原爲三師迭進賊可平也衆然其
言乃歃血誓師簡卒乘繕甲仗各出私財佐軍守具未
備賊將李過已引兵十萬抵城下廷傑募死士乞師套

部師將至賊分兵却之攻城甚力官軍力戰殺賊無算
賊益衆來攻起飛樓逼城中矢石交至世威等戰益厲
守七晝夜賊乃穴城置大礮轟之城遂破世威等猶督
衆巷戰婦人豎子亦發屋瓦擊賊屍相枕藉旣而力不
支任家錄死之故總兵侯世祿與子前任山海總兵拱
極故天津總兵王學書故宣府總兵董學書故都督一
元子也與前副總兵潘國俊參將王榮榮子師易竝不
屈死攷異王榮父子死明史忠義傳一時同死者鄉官
前戶部主事張雲鷄前隰州知州柳芳前真安知縣彭
卿前湖廣監紀趙彬皆不屈死指揮崔重觀自焚死傅

伯與妻杜氏自縊死中軍劉光祐罵賊死材官李耀善射矢盡自刎死李光裕趣家人死亦自刎張天敘焚其積貯自縊死千戶賀世魁偕妻柳氏自縊死前任安邊參將馬鳴節聚妻子室中自焚死前任山海參將尤岱自殺于水西門前任西安參將李淮令妻女自縊率子殺賊自刎綏德衛指揮鍾茂先先殺妻子而自殺其以力戰死者里居則前山海總兵楊明前定邊副將張發雲鶚子也前靖邊副將尤翟文世威從弟也前孤山副將王永祚前西安參將李應孝與妻女皆自縊死在官則游擊傅德潘國臣李國奇晏維新陳二典劉芳馨文

侯國都司吳繼武中軍楊正韓柳永年馬應舉守備尤
勉惠漸賀大雷楊以偉指揮李文焜李文燦黃廷政千
戶黃廷用百戶黃廷弼廷用廷弼皆廷政弟裨將文經國而副將
常懷李登龍游擊孫貴尤養鯤守備白慎衡李宗叙亦
以守村堡遇害諸生陳義昌沈濬沈演白拱極白含章
馮賊死張連元連捷李可柱胡一奎李廕祥自縊死賊
怒廷傑勾套部磔之至死罵不絕口其弟廷夔收兄殘
骸瘞之亦自投閭死世威及故總兵王世欽王世國李
昌齡竝被執縛至西安自成坐秦王府欲降之四人不
屈自成曰諸公皆名將助我平天下取封侯可乎衆罵

曰汝驛卒敢大言侮我自成笑前解其縛世欽唾曰驛卒母近前汗將軍衣自成怒皆殺之世威弟世祿亦死惠顯及都司郭遇吉同被執遇吉罵賊死賊惜顯勇繫至神木服毒死一城之中婦人死義者數千人井中尸滿賊遂屠其城榆林爲天下雄鎮兵最精將才最多然其地最瘠餉又最乏士常不宿飽乃慕義殉忠志不少挫無一屈身賊庭其忠烈又爲天下最事聞上嗟悼將大行褒恤會國難作不果是月李自成乘勝連陷甯夏慶陽先是自成據西安分兵四出甯夏鎮兵迎戰殺賊數千賊乃去平涼甫聞警韓王賈垕及監司以下謀

遁去知府簡仁瑞謁韓王曰殿下輕棄三百年宗社欲
何之縱賊墜境甘涼諸鎮軍足相援必不能支同死社
稷亦不辱二祖列宗王不從一夕其護衛卒大譟挾王
及諸郡王宗室斬關出脅仁瑞行仁瑞曰吾平涼守也
吾去誰與守韓王遂奔慶陽官吏皆走未幾賊抵城下
士民數人草降書乞僉名署印仁瑞怒叱責之正衣冠
自經堂上義民朱傑軒孟尙池仰藥死而傑軒闔門殉
焉又有平涼馬夫者佚其姓名隨驛使殺賊被執寸磔
死平涼旣陷屬城皆降獨華亭教諭鄒邦榮訓導何相
劉率諸生共守城先是邦榮欲援曾子居武城義避去

相劉曰吾輩委質爲臣安可以賓師自處城陷二人遂
同死之時自成已大發兵攻陷榆林憤甯夏之敗悉銳
薄其城總兵官撫民以城降中後衛城悉陷鄉官故
懷仁知縣雍締闔室自焚死里居指揮彭凌雲百戶鄧
德甯與義民王風木糾衆討賊謀泄死賊遂連犯慶陽
圍數匝參議殷復興集衆守發礮石殺賊滿濠久之勢
不支拜辭其母聚妻妾子女于樓寘薪其上復乘城督
戰城陷趨歸火其樓母亦投火死乃馳鐵鞭走北門擊
殺數賊遂自刎同時死難者推官靳聖居方擢刑部主
事未行遇害安化知縣袁繼登都司周家彥率衆巷戰

殺賊數百人皆死之鄉官故太常少卿麻僖諸生石瑄
李彝殉焉其屬城則甯州知州董琬環縣鄉官故照磨
朱國禎故武邑典史張宏遠亦殉節賊執韓王以去將
趨漢中扼于官軍不得入覆其所屬城固縣知縣司五
教斬諸生爲賊內應者誓死守城陷爲賊所磔訓導竇
汝器亦死之鄉官故江西巡撫張鳳翮故福山知縣方
振寰貢生岳中衡均遇害 兵部尙書馮元懿引病歸
以張縉彥代之 十二月辛酉朔恒星晝見 壬戌張
獻忠陷建昌 乙丑周延儒賜死延儒被逮適舊輔王
應熊奉召至京師延儒知上怒甚宿留道中俟應熊先

入冀爲請上知之應熊旣至命之歸比延儒至安置正陽門外古席上疏乞哀不許法司以戍請同官申救皆不許至是吳昌時弃市勒延儒自盡籍其家 丁卯張獻忠陷撫州方賊陷吉安建昌廣東南韶大震屬城盡逃副使王孫蘭請救不應連城守將先據城叛憤而自經時兵部侍郎呂大器方代侯恂爲總督無兵不能救左良玉以恂解任中道逮下獄知其爲已心鞅鞅與大器齟齬亦不援其部將馬進忠僅復袁州而馬士秀復岳州後與賊戰于嘉魚再失利良玉軍遂不振顧獻忠終憚良玉不敢南行有獻計取吳越者謝不用于是始

決策入川中

攷異諸書或言馬士秀復袁州馬進忠復岳州而殺寇紀畧九江哀卷內所記良玉

復州縣原奏則復岳者士秀也史稿亦言馬士秀復岳州今據書之

辛巳李自成遣前

鋒渡河入山西陷平陽殺西河王等三百餘人平陽總

兵陳尙智降于是山西州縣先後潰或望風請降秦晉

之間皆爲賊有甲申李自成陷甘州先是自成據西

安遣其黨賀錦田見秀等徧掠三秦郡縣于是鞏昌之

安定會甯秦安皆先後陷安定知縣應昌士城陷不屈

死妻周氏亦遇害會甯知縣王垣以安定令攝縣事爲

賊所執令說後任應昌士降以登城勗以死守遂被害

秦安知縣朱呈瓘亦死之鄉官故開封同知劉躍龍安

定人貢生張國統戴天諸生王保民唐維新李洲楊毓秀陳周瑞楊中葵劉翹名楊九儀王璽薛三戒楊道泰高朝鳳張大才監生陳周鼎張大韶十七人者皆安化人而保民兄保泰弟保貞從孫宏毅周瑞弟周哲亦以捍賊被殺是時秦隴皆沒惟甘肅帶河爲固賊破鞏昌諸縣遂移兵逼蘭州蘭州人開門迎賊賊渡河涼州莊浪二衛亦降至是進犯甘州巡撫僉都御史林日瑞聞賊至急結西羌嚴兵以待而自率副將郭天吉等扼諸河干適嚴冬河水合賊踏水過直抵甘州城下日瑞入城且戰且守大雪深丈許樹盡介角斡折手足皸瘃守

者咸怨賊乘夜坎雪而登城陷執日瑞誘以官不從磔于市天吉及總兵官馬爌副總兵張攀歐陽袞劉國棟游擊楊威趙宗禮萬峒撫標中軍哈維新都司姚世儒姜宏基高登科監紀同知藍臺皆死之攀一家俱殉袞焚其妻子巷戰死國棟闔門自焚死威爲賊斷喉絕脛死宗禮將火其家僕負其子金剛保以逃宗禮手刃之家無一人脫者峒從林日瑞殺賊被執磔死臺從天吉拒守死鄉官則故總兵官羅俊傑趙宦游擊李如璋指揮趙宗祝李棲鷗姚天寵張洪勳王嘉官趙采故太湖知縣段自宏故靖遠衛教諭童志道千總劉燦貢生張

之衡保獻書諸生張名禮張聖翼康國新童士楷丁倫
康萬秋祁士英醫士費國興吏員梁進法義民朱文選
馬騰錦郭世潔竝死之俊傑故總兵一貫子與其弟俊
士同殉如璋同子起鳳祥鳳集鳳射賊皆被殺宗祝與
子案自刎妻妾亦投繯死棲鴟洪勲嘉官同巷戰力竭
自刎天寵迎戰被殺家人皆自焚死自宏捐貲餉士城
陷自刎燦卽國棟子也甘州旣陷居民猶洶洶欲殺賊
賊乃闔城扉殺其民四萬七千人三邊陷沒列城望風
降惟西甯衛獨固守不克留賊將賀錦圍之賊已無復
後顧憂竟長驅而東謀僭尊號矣

攷異是年闖獻分犯
地方其年月之先後

惟明史本紀所載千支與綬寇紀畧所記日分無不脗
合間有相差者不過一日蓋所據大小建之異耳若殉
難地方紳士重修三編悉據明史忠義傳分月彙編較
之輯覽多至數倍蓋三編重修之時正賜謚勝朝殉
節諸臣故所搜輯采訪尤詳今悉據
之其一二遺脫者據明史輯覽補

丙戌左良玉復

長沙 是歲浙江有許都之亂許都者東陽諸生副使
達道之孫家富任俠好施陰以兵法部勒賓客子弟思
得一官紹興推官陳子龍常薦諸上官不用會有義烏
奸人假中官名招兵者都無與也東陽知縣姚遜木
都所有文致都求賂不應都葬母山中會者萬人遜木
告監司曰都反矣遣役收捕之送葬者大噪遂裹帛反
號白頭兵旬日間聚眾數萬連陷東陽義烏浦江遂逼

金華既而引去巡按御史左光先命子龍爲監軍往討
稍有俘獲都退屯山中官軍仰攻不能下監司欲撫之
語子龍曰賊聚糧據險非曠日不克我兵萬人止五日
糧奈何子龍曰都舊識也請往察之乃單騎入都營責
數其罪諭令歸降待以不死遂挾都走山中散遣其衆
而以二百人降光先乃斬都等六十餘人于江許自是
一二年間浙東土寇蠶起皆稱白頭兵蓋自都始 是
年爲

大清崇德八年八月

大宗文皇帝崩

世祖章皇帝嗣位以明年爲順治元年